



清閼閣集



97.451  
5339  
:35

35



清閔閣全集卷之四

七言古詩

送徐君玉


閩江之水清漣漪，隔江名園多荔枝。閩中女兒天下自，越波飛檣逐鳧鷖。棹歌清絲洲渚闊，蕩槳落日令人悲。蠻煙怪雨忽冥密，蔣芽蒲葉相參差。此中勝事不為少，徐郎遠遊牽我思。

寄張徐二秀才

東膠山麓繚修阻，春水鳴渠竹滿園。立真棲遁樂耕釣，徐孺風流存子孫。適我騎犢詣其處，荷爾作黍畱清言。夜闌把燭竟歸臥，煙草蜨飛勞夢魂。

十二月七日岳季堅夜坐走筆贈之

僧扉共臥風雨夕，岳生清真何太顛。持家有弟足自慰，無錢沽酒殊可憐。梅蕊衝寒欲破白，一作愁欲破燈花惱人故生妍。孰知旅枕作孤夢，周處廟前行買船。



古意一首答曹德昭

齊王好竿客鼓瑟操瑟何以干齊門古人結交多豪傑况爾封君之子孫王國陳詩終大雅楚俗尚鬼悲招魂相思日暮不可見鴻飛冥冥目力昏

劉君元暉八月十四日邀余玩月快雪齋中對月理詠因賦長句

二首

卷簾見月形神清疑是山陰夜雪明長歌欲覓剡溪戴悵然停杯遠恨生爾營茅齋名快雪邀我吹笙弄明月明星如銀浮翳消垂露成帷桂花發酒波蕩漾天河傾笙聲嫋嫋秋風咽古人與我不並世鶴思鷗情迴愁絕

涼月紛紛疑積雪凝暉散彩白於銀此時獨酌開軒坐便欲剡溪尋隱淪爾營茅齋名快雪我醉行吟踟秋月河漢無聲風露寒心境泠然同一潔

餘不溪詠并序

開玄館在餘不溪濱距溪無百步上清王真人所居溪流過浙  
盈演玉光澄映與他水特異故為名焉庚午歲春因市藥過浙  
江趣便道將歸梅里俯斯水而說之拆流間詠燕嘯巖洞竟日  
壇宇近在東麓遂舍舟造其下真人為出酒脯燕嘯巖洞竟日  
乃返悠悠祖歲忽已十有七年暑矣余既為農畝賦身依稼穡  
復爾政繁奔走州里欲為昔遊其可得乎鍊師超然物表閒情  
夷朗周覽宇內將還玄館余因彷彿曠昔之所觀追賦短章以  
饒斯別若夫超躡瀟瀟道遙玄邁蓋深志於是矣覽而詠言能  
無動悲慨乎

餘不溪水綠生蕓放舟演漾當青春舟隨鶴影忽行遠洞口桃花飛接人雲松蔽虧煙蘿席儼在溪東之石壁羽人垂衣坐鼓簧饋

我晨冷芝菌香從茲更發洞庭渚濯髮咸池臨故鄉

餘不溪水涵綠蕓微風吹波蹙龍鱗看山蕩槩不知遠花開白鹿

來迎一作兩岸桃花飛接人溪迴路轉松風急竹林華房霞氣溼忽逢道士

頽而長疑是韓國張子房相期飄拂紫煙裏下攬滄溟浮玉觴

醉題許生壁

生有破屋山西村風雨不出臥衡門藁書其閒讀且溫客來輟書

就琴尊寂寞古道安可論

醉歌行次韻酬李徵君春日過草堂賦贈

昔年杜陵之茅屋汀花冥冥汀樹綠舊題新詠答年華種朮行椒  
繞山麓石牀丹竈青琅玕春渠流水夜潺湲當年寶劍淪黃土空  
餘山月照波閒今我不樂懷往古短世紛紛誰比數花下欣逢李  
白來山鳥溪童亦歌舞酒酣長嘯五情熱軒冕何榮築巖說邈然  
抗節餓首陽何異佯狂抱貞潔君歌已竟歌我詩賢愚榮頓百年  
期少文豈愛壁間畫老疾俱來難命駕仰視翕忽浮雲馳安得乘  
螭與雲化楊花縈夢滿晴天迸壑春雷驚醉眠李侯神清色不動  
手敲茶雪落輕煙相逢爲樂誠草草竟欲攜君臥煙島城郭秋風  
白鶴飛海上冷霞不知老  
杜陵昔年有茅屋浣花溪邊錦江曲古人不見春風來桃李無言  
自山麓石牀蘚澀青泥乾決渠流水夜潺湲可憐寶劍埋黃土空  
餘山月照波閒今我不樂空懷古短世長年誰比數花下那知李  
白來山鳥恣歌童亦舞酒酣大嘯五情熱作相形求築巖說夷齊

相逝居首陽逍遙采薇飽芳潔勿歌虞夏神農詩賢愚等是百年  
期魯連恥秦亦蹈海笑爾局促商山芝少文壁閒對圖畫莫待老  
來誰命駕仰看翕忽浮雲馳安得乘螭與之化漠漠楊花縈遠天  
迸壑晴雷驚醉眠李侯神爽色不動手中茶雪落輕煙逢君此樂  
誠草草便欲攜君臥煙島海上千年白鶴飛世人何爲而自老

江南春

汀洲夜雨生蘆筍日出瞳矓簾幕靜鶯禽蹴破杏花煙陌上東風  
吹鬢影遠江遙曙劍光寒轆轤水咽青苔井落紅飛燕觸衣巾沈  
香火微縈紛塵春風顛春雨急清泪泓泓江水溼落花辭枝悔  
何及絲桐哀鳴亂朱碧嗟胡爲客去鄉邑相如家徒四壁立柳花  
入水化綠萍江波搖蕩心恆營

江南春詞二闕和倪雲林韻

周履靖

春林夜雨朝迸筍桃李芳菲門徑靜主人寂寂對疏櫺簾外交  
飛雙燕影峭寒風雨羅衣冷幾樹梨花開近井社酒歸來倒角

巾敲斜醉步動輕塵 蝶飛忙花信急杜鵑聲裏春衫溼韶光  
撚指嗟何及倚樓芳草連天碧幾處笙歌滿城邑垂楊繫馬風  
前立請看綠水汎青萍堪笑隨波空自營

村前萬樹桃花盛綠柳垂絲閒紅杏呼朋拉友玩芳春歷徧韶  
華三月景雕鞍金勒相馳騁青樓柳巷追佳興吳姬嫋娜笑歡  
迎握手殷勤話更親 入蘭房檀麝集銀鐙翠管延嘉客冰盤  
玉饌陳芳席金尊激灩浮琥珀玉指纖纖調錦瑟牙牀繡帳娛  
此夕金雞三唱促登程惆悵相看不盡情

賦許君震杏林小隱

江上春雨歇喬柯散繁花開尊藉莓苔共醉仙人家霽景麗華彩  
微波搖絳霞東風夜來急吹雪滿江沙明朝杏熟虎爲守郊原綠  
徧聞鳴蛙

贈顧定之

輕薄紛紛新少年論詩作賦如湧泉爲雲爲雨手翻覆背面傾擠

當面憐阿翁七十仍踰四與我同心生並世高臥白雲食絳霞草  
堂門對靈巖寺

贈康素子

道德五千言玄之又玄谷神不死曰玄牝用之不勤以絲絲太  
原道士康素子口講此書手畫指猶龍之後有蒙莊迴薄宇宙有  
根柢蝴蝶栩栩觀物化濠魚洋洋樂何似壺邱弟子任風遊遊仍  
有待曷足恃尻輪神馬鴻濛外恍惚杳冥隨所止化人之居臨太  
清十二重樓臨五城千劫謂如一食頃不起於座空飛行王喬鶴  
上吹玉笙食棗東海安期生雲車霓輅到平地渴飲懸河天爲傾  
大茅登雲二弟迎紫虛永和傳玉經楊曦以授許長史玉斧清映  
道初成貞白子微如日炯千巖萬壑春冥葛玄登鍊匡廬頂淵  
雷一聲眠鶴醒道陵章奏陽平治子孫繩繩祖武繼重陽晚出金  
末裔全真爾名欽世世仰瞻在昔老莊列近比肝膽遠胡越要知  
道不出智勇疾似秋空鷹一撇素乎素乎爾鄰乎道德而不孤凡

夫皆具仙真體一扇仁風病即蘇

寄徐元度

二月苦雨晝如晦閉戶獨眠無所爲黃鳥翻飛乍依竹櫻桃爛熳  
開滿枝起覓杜康欲自慰坐無徐孺令人悲春帆早晚江西去東  
湖宅前舟可維

陸隱者禱雪獲應

紇干山頭黃草枯年年雪花大如掌春風草綠牛羊蕃誰爲祈禳  
復誰賞南雪由來到地消今年冬暖知爲妖民間禱雪誠希有旱  
禱桑林聞昔謠

鄭有道隱居梁鴻山

伯鸞近在東山陲室無孟光唯兩兒草堂資煩王錄事蓮社緣依  
遠法師迎我埽除松下雪因君起寫壁聞詩便思從子遂真隱深  
谷紫芝堪療飢

賦耕雲贈友

大茅峰前萬頃雲煙耕雨漑曉網縑也知神物無根蒂誰種空山  
誰與耘愛君茅屋當南面閒看陰晴玩其變白鶴眠松夜夜歸朝  
逐孤雲如匹練

贈季丙卿

季子蕭條千古心斷碑荒冢在江陰行人過客寧知此春雨年年  
江水深君家一作家正近延陵郭世遠義風猶未薄誰識寥寥末裔  
一作孫種杏成林惟賣藥

延陵道

延陵道去國千有餘里民風質直昔季子攸居義興其屬邑過百  
里而遠麗於南隅民當西晉有周處肆勇鬪很於鄉閭人皆以爲  
患父老揚言其非一朝發憤易行忠孝俱其歿已千載民今仰而  
祠我幸生居在鄰邑春服始成來游而來娛式逢劉公揚驪踟躕  
酌山之泉擊渚之蒲相率奠拜步趨檐如歎詠而去方舟載塗錫  
山之陽其水舒舒山氣磅礴而敷腴上升爲雲雨彌滿乎九區厥

土沃若君子於以田  
斂公度中流揚揚其旗  
載挹載注原茲古初  
睠此平墟泰伯所都  
夫子所謂至德也已  
矣吁嗟逝流百世下  
聞其風者尚敦乎薄  
夫

送潘生適越

鏡湖春水綠  
汙汙兩岸楊花飛  
白雲落日繫舟微  
雨歇一壺濁酒  
飯香芹嘉爾盛名  
年少得筆精墨妙  
比羊欣日長高臥  
無餘事應有人書  
白練裙

贈陸子華

爲愛泖西春水綠  
三年不來今乃復  
如來不三宿桑下  
子華留我經旬宿  
東鄰唯有沈休文  
文字詩篇與討論  
時時亦復具雞黍  
未能厭飫嘉盤飧  
爲君吐出無味句  
歎爾網魚共濡煦  
不作卑卑兒女情  
仰天大笑飄然去

宿薩判官家聽琴

薩公能琴賢且文  
城闔一遇何懽欣  
高齋一作埽榻新  
雨霽爲鼓

瀟湘之水雲竹林  
蕭瑟風嫋嫋  
山日掩靄波  
汙汙曲終推琴意  
逾

妙

一作淡

高山流水餘音聞

一作忍卽別  
去隨飛蚊

送錢成大赴淮南

桐柏山高淮水闊  
道途悠悠心忽忽  
大藩作鎮據兩淮  
公侯干城孰子越  
帶雨春潮送櫓聲  
淮山千里青相迎  
隱居行義今寥落到  
邑煩君訪董生

李徵君將還揚州因言沈郎官吳中賦此以寄

二月桃始華  
淮南客還家  
階前疏雨落  
堂上春衣薄  
爲言沈約在  
吳中  
玉壺青絲酒如空  
春風相過蕙草綠  
芳菲滿堂樂未終

姚節婦詩

節婦復節婦  
處心良獨苦  
苟不義以生  
寧從義而死  
荆南流水石  
齒齒寇辱形  
虧旣清泚  
妾可死不可辱  
夫從父生死攜  
女婦兮婦兮死  
所安使我感激涕  
洟瀾古今出處多  
射利委身事國爲  
貪奸羸王易主意未  
殫身沒令名生美  
官嗚呼史臣直筆  
古來少孤臣



直節今尤艱

奉寄沈理問

紫霞虛皇之上清迢迢十二樓五城煙霧窗扉鳥為使霞綃衣裳  
翠織成雲旂芝蓋一作翠旂集真侶清露如鉛籠玉宇回看人世方虺  
蟬擾擾泥塗困雲雨騏驥繫足鳴何飢黃鵠截翻不得飛杜鵑哀  
號鷓鴣泣苦竹嶺頭無月輝可憐仙凡一塵隔哀樂紛綸殊不極  
人間亦有學仙人神巫傲傲舞瑤席精靈翕忽虹影長觴湛桂酒  
羞楓香雲情蜷局難為駐世味臞腥不足嘗仙人舊亦人間住乘  
雲往列仙曹署願從帝所話悲辛明良畱心乃奇遇我聞天道自  
循環福善殃淫帝所關令威亦成歸來願豈遂忘情出兩閒

贈丁醫士

泊舟風雨芙蓉城江上君山雲錦屏我來已是千年後館主子孫  
猶姓丁丁君手煉不死藥芙蓉仙人久相約孤鰥七十老無家種  
杏春來一作林看落花

詠鶴

丹鳳葳蕤何處藏翳茲天孫雲錦裳嗚然長鳴引圓吭晨飛峨峨  
一作峨暮長常玉笙寥寥佩琅琅千年仙驥時歸翔步苔飲泉下趨  
踰忽然不返歲月長爾居雞羣獨彷徨羽衣猶白未老蒼清都霄  
臺應已忘啄腥吞腐塵土鄉乘軒豈復思華陽樊籠未離勿張皇  
蟬竦

歲己亥春仲月之六日自寅迄酉震雷且雪甲辰暮冬日癸卯蟬  
竦見於震陬飛龍挾雷電落景皎出月老夫頻年熟災異夏淒其  
風冬乃熱晝霧暝如夜淫雨十旬浹疲農不使憩殘喘志士不得  
安巖穴國之祇診古亦有十月雷電天或隕石或雨血人君修德  
災可弭桑生於朝赫王業方今滔滔天下墊鋒鏑四起羣豪傑孰  
能拯亂以為治嗜仁而不虐吁嗟斯民命矣夫荼毒殘傷亦何辜

秋鶴軒

開軒北郭名秋鶴鶴影翩翩向寥廓不見千年丁令威悲嗟城郭

是耶非紛紛霜葉飄庭樹苔色荒陰翳煙霧草逕透迤深樹中時  
有山僧自來去

賦翠濤硯

岳翁嘗寶翠濤石今我還珍翠濤硯翠濤泐泐生穀紋雲章龍文  
發奇變元章硯山徒自惜此硯顛應未曾見我初避亂失神物玉  
蟾滴淚空悽戀珠還合浦乃有時洗滌摩挲冰玉姿書舟輕迅逐  
鳧鷖喜出火宅臨清漪松雲磨香泮毛錐天影江波映碧滋一詠  
新詩開我眉

題王元用秋水軒

秋水如玉涵綠蒲玉壺美酒清若無佳人倚窗調錦瑟文君勸飲  
坐當壚昔年種柳繞漢南樹今搖落人何堪惟有年年秋水至翠  
煙石黛漾晴嵐開軒清映臨秋水斜日荷花淡相倚凌波微步韞  
生塵交甫凝情佩還委

送顧生歸四明

江上買舟歸四明楓林搖落一作竹枝嫋嫋秋風生好營三釜爲親養此  
去千里飛雲情禾稼登場候雁至霧雨如晦晨雞鳴舒王舊日宰  
邑處苔石縱橫湮姓名

贈陶得和製墨

麋膠萬杵搗玄霜螺製初成龍井莊悟得廷珪張遇法古松煙細  
色蒼蒼桐花煙出潘衡後依舊升龍柳枝瘦請看陶法妙非常一  
點濃雲瓊楮透

郭文顯推人禍福神驗賦贈

昔者馬季主賣卜如有神郭君言禍福奇中乃其倫願我年衰野  
而慙尚復紛紛嬰世網爲卜明年春水生欲問桃源刺漁榜

題陳氏齋壁

愛爾茅齋寡塵鞅一作雜時來下帷清晝眠風流任一作政使書裙去  
懶慢惟知坦腹便林閒病鶴尚俯啄池上山雞徒自憐何爲當年  
種桃者移家偶脫區中緣

題曹雲西畫松石

雲西老人子曹子畫手遠師韋與李衡門畫掩春長閒彩毫動處  
雄風起葉藏戈法枝如籀蒼石庚庚橫玉理庭前明月滿長松影  
落吳淞半江水

對梓樹花

去年梓樹花開時美人明璫坐羅帷今年梓樹花如雪美人死別  
已七月梓花如雪不忍看沈吟懷思淚闌干鳴鳩乳燕共悲咽柳  
絲風急煙漫漫

題趙榮祿馬圖

嘗聞唐開元時畫馬曹將軍妙合變化神紛紜少陵爲作歌其詞  
藹如雲又聞宋元祐之中李龍眠畫法奄出將軍前蘇黃二子誇  
神駿險語驚飛蛟蝥淵國朝天馬來西極振鬣駑駘爲辟易玉堂  
學士寫真龍筆陣長驅萬人敵學士歌詩清且腴當時作者數楊  
虞畫成題就兩奇絕價擬一作連城明月珠吁嗟天馬天一隅寶

繪於今亡矣夫學士多師內廐馬得法豈在曹李下俗工未解知

神妙此日罷駑徧華一作區夏好事流傳亦苦心誰爲幽賞伯牙琴

獨悲蘭亭繭紙隨零雨轉覺臨寫紛紛費毫楮

爲曹僉事畫溪山春曉圖因題

荆溪之水清漣漪溪上晴嵐紫翠圍連舸載書煙渚泊提壺入林  
春蕨肥身遠雲霄作幽夢手栽花竹映山扉磯頭雪影多鷗鷺也  
著狂夫一浣衣

畫寄王雲浦

吳松江水漾春波江上舟歸發棹歌邀我江亭醉三日鳳笙鸞吹  
拂雲和紛紜省署縻官職老我澄懷倦遊歷看君骨相自有仙故  
作長松挂青壁

題畫

橘窗春夜雨潺潺翦燭裁詩畫碧山迸水定侵林下路蕙花委砌  
石苔斑夢乘艇子清江闊坐聽橈聲暗相撥未必漁翁似我閒棹

歌不待鳴鳩聒

畫竹贈王允剛

子猷借地種修筠何可一日無此君葉籠書席搖翠雨陰結香爐  
屯綠雲間孫住近吳江渚二仲遨遊如蔣詡置酒邀余寫竹枝隔  
竹庖人夜深語

題畫竹

吾友王翁字元舉喚我濡毫畫縑楮喬柯修竹蒼蘚石霜葉風梢  
碧滋雨湖州仙去三百禩坡翁高絕孰與侶黃華父子亦閒出氣  
粗惜產旃裘所本朝高趙妙一世蔑視子端少稱許薊邱黃巖筆  
墨閒瑞鶴神鸞競翔翥二公去後無復有谷鳥林鳥誰指數奎章  
博士丹邱生未若員嶠能濡响道園歌詠譽丹邱坡曉畫法難為  
語常形常理要玄解品藻固已英靈聚少陵歌詩雄百代知畫曉  
書真謾與坡深書畫詩更妙味永甘香試耽咀嗟余生後愛詩畫  
所恨遨遊不從汝王翁好古已成癖說史談詩身欲羽吳江遇我

意慷慨一作涕飯我羹芹一炊黍晚持此卷索塗抹醜婦為顰走  
鄰女此詩此畫君勿笑焚棄筆硯當尊俎

題畫贈呂彥真

江上秋雨晴泊舟煙水汀孤吟誰和子悠悠蟪蛄鳴故人邀我畱  
三宿豆畦蘿徑居幽獨松醪陸續酌山瓢鐙影縱橫寫風竹水光  
雲氣共悠悠鶴思鷗情樂此畱無禍無衣悲骭麟三沐三薰歎伊  
優君自息機江上住我且沿洄從此去圖訖新詩草草裁眼底流  
光水東注

至正十三年三月四日同章鍊師過張先生山齋壁間見柯敬仲

墨竹因懷其人其詩文書畫鑒賞古跡皆自許為當代所少狂

逸有高海岳之風但目力稍怨耳今日乃可得耶

柯公鑿書奎章閣吟詩作畫亦不惡圖書寶玉尊鼎解文彩珊瑚  
光錯落自許才名今獨步身後遺名將誰託蕭蕭煙雨一枝寒呼  
爾同遊如可作

送潭州魯總管

翩翩文鵷飛渡淮葳蕤五采下天階西疇昨夜雨初徧田父謳歌  
有好懷湘潭山色隨輕轂談笑來爲此州牧隔岸桐林散綺霞三  
月洞庭春水綠

十一月廿三日率性德原共載過林下而余適不在遂返棹還家

明日詩來因次韻重邀之

雲林風雪德不孤指顧可求塗豈迂兩忘主賓政自好一以禮法  
何其拘我方飄忽念歲月君乃疏豁笑人奴再爲理棹急相就放  
筆看寫狂遊圖

題文貞公墓道奉先亭子

奉先亭子山之陰雲氣低迴何處尋烏啼隧道風林靜薛剝龜趺  
雨溜深故老猶言前日事鰕生謾感二毛侵河山流峙英靈在世  
事紛紛一短吟

恆德堂

虛林閒居養黃靈隱几逍遙遊玉京怡然樂康息天黥良醫良相  
仙道并厥施同仁而異名沒身身存故長生龍虎佩符鳳皇翎出  
戲玄洲入紫清一念不已三千齡子能神視廬幽貞觀恆斯見天  
地情氣專志一德乃恆

賦清隱閣

爾營草閣名清隱著在輕鷗遠水邊春池覓句正思爾拄杖敲門  
忽繫船共賞奇文哦庾信更誇草聖法張顛到此自忘歸興逸研  
雲歸寫古苔篇

寫墨竹贈顧友善

顧伯末派隱君子林居江濱古東里潔身潔行讀書史思友天下  
之善士綠竹猗猗蔚材美獨立不懼羣不倚長吟揮毫爲君起寫  
其形模惟肖似諒哉直清可以比

贈邱氏兄弟及周生

岑參兄弟皆好奇二邱那復論東西款門看竹我初到置酒投轄

烏欲棲掃壁寫圖觀落墨滄芹畱坐綴新題東風甚與周郎便桃  
李陰陰畫滿蹊

題柯敬仲竹

誰能寫竹復盡善高趙之後文與蘇檢韻蕭蕭人品係篆籀渾渾  
書法俱全章博士生最晚耽詩愛畫同所趨興來揮灑出新意孰  
謂高趙先乎吾

古劍行

雍公孫子氣甚清示我楊顛古劍行劍鋒詩律兩奇絕秋蓮光彩  
玉庚庚楊顛健筆老縱橫是亦鐵中之錚錚吐詞鬱嶽鳴不平鳳  
皇來爲盛世鳴一代惟數虞翁生余也學書學劍既老何由而成  
名

富貴詠

富貴詘於人曷若貧肆志何從得此言聞之魯連子鴻飛冥冥天  
爲低下視俯啄何卑微去去煙蘿碧巖裏瀑流千尺洗塵衣

食無肉

食無肉兮出無車旅無依兮歸無家秋風嫋嫋江漢槎遠波落日  
明荷花枳棘芟芟道云賒飛蓬蕭颯雙鬢華夜有吟蛩晨有鳴蛙  
玉琴在匣但聞淫哇龍劍挂勝幽遐吾生有涯知無涯世迫隘兮  
紛浮華思從何漏求丹砂忍食安期棗如瓜高臥白雲冷絳霞  
趙善長氏妙於繪事以荆關法爲遜學周君畫天香深處圖爲賦

此篇

周君洵美玉色溫有宋尚書之子孫尚書第宅古閩國秋風老桂  
蒼雲屯有子五人總攀桂孝友才華稟忠義周君今住讓王城澤  
流絲延俄八世載懷先世發詠歌月明珠樹粲交柯白榆歷歷不  
可數手援北斗酌天河尚書父及子騎箕入霄漢逝波逐回風翕  
忽驚世換清芬沾灑後人多翠靄金葩影零亂鳳歌我亦楚狂人  
吳市經遊幾度春汎汎去來舟不繫狎鷗決去忽難親天香深處  
畱茶屋爲愛珍圖思超俗好繩祖武揚德馨公侯之始爾其復

次遜學廣文舟出金焦山韻

眼前金芙蓉一朵迎人青  
焦山岌業蒼石稜長江無波素練平  
蛟鼉出沒魚龍變化翕忽徒南溟  
絳霞晴虹映朝日光彩激射雲錦  
屏指點齊州瞰吳楚欬唾萬里吞  
爲吐江水潺湲橫淚流古人去  
我今幾秋有子仲謀才不佞多情  
度亮晚登樓溯流轉柁鳴津鼓  
歷亂沙鷗起檣櫓當時行樂恣經  
過舉酒觀魚登網罟海若決水不  
滿酌任公釣鼈且胥俎棹謳清絲  
斷復續瑤草琅玕動盈掬豈意一朝  
憂患生夫君處南予處北江流東  
去不西迴爾亦胡爲乎嗟哉寒蜂  
長吟送落景砌蛩悲切助予哀  
仙人王子喬吹笙駕風雲招邀女  
媧補天手鍊石看作五色文

和周正道拔時髦韻

何處林閒搭鳳毛鳳兮葳蕤潛九  
苞空林春風露梢梢雉雉不聞  
鶴鳴皋雲中金支紛翠翹龍鸞天  
矯羣仙翹網羅張弛野喧囂羣  
飛畢命罔遁逃隕身析翮隨所遭  
毋啄我殼傾我巢鳳兮麟兮遠

莫招腥風血毛灑林郊隼鷗飛擊  
當絳霄西飛鷗鵠東伯勞旭日  
鳴雁聲嗷嗷鬼車鸛鷓鴣鴟鴞  
風雨如晦聞呶號時乎時乎孰如  
嘲吁嗟清濁寔混淆拔乎其萃  
皆時髦

春草堂

是日袁君子英同集軒中壬子正月五日也

春草軒中隱几坐中有袁髯開似  
我欲浮清海狎羣鷗擬向鴟夷  
借輕舸二月水煖河豚肥子苦  
畱我我懷歸半鐺雪浪薰香茗  
婦榻蕭條共掩扉麝煤繭紙齊  
梁筆寶繪珍題品神逸洗滌古  
玉龍眠池臨榻奇蹤淨名室紅  
蠶捲碧春將酣檳榔萋葉嚼香  
甘夜闌更鼓湘妃瑟笙磬同音  
詠雅南別君此去何草草山爲  
迴旋海爲倒令威白鶴會重來  
世人胡爲易衰老

至正丁酉十一月五日余友陳兄  
惟允過余旅寓鼓楚詞一再行  
因寫墨君并走筆賦長句以贈  
時漏下二刻矣筆硯荒落自愧  
草草惟允當有以教我耶

陳郎鼓琴初月明能對楚人作  
楚聲江風動地波撼席蘆雪撲  
帳

雲棲裳每驚遠道意慘愴忽此聚首心怔營賦詩寫圖以爲贈比竹貞德琴亮清

寫松江山色并詩贈子俊茂才

窮冬舟過吳淞渚千里交歡少枯呂范張一室小如壺雞黍時時慰羈旅阿兄彈琴送飛鴻讀書頗有沈潛功阿弟煮茶敲石火滿江春雨聽松風圖書四壁醒愁睡隱几嗒然忘世慮扁舟一葉五湖遊身與閒雲共來去三月六日天氣清爲爾詠出詩無聲袖有青銅錢二百爲余沽酒作魚羹

題虞勝伯畫仙臺高士圖

仙臺有高士聞在最高峰濯足五湖水結巢千歲松霞扉雲扇闕丹壑落花如雪吹微濛醉顏高臥日曛曛飛鳧蹴蹋金芙蓉絳綃爲裳一作紫玉鍊容往來倏忽其猶龍伊誰貌此世外蹤青城山人仙中翁運筆直與天同功倪生作詩以詠歎凌跨倒景他日期相從

壬子九月望日過孤雲大士寶淨精舍畱宿十九日爲寫林亭遠岫圖并賦

岫圖并賦

敬亭山色青如染妙德端居在西崦片雲出岫本無心拂石縈林晴冉冉江西帆影又江南笑看羣狙于四三道遇化城聊暫止更營寶淨小禪龕  
題趙千里扇上畫山  
誰見解衣作盤礴卷懷雲煙歸掌握冥冥江水深一作波竹閒日暮衣裳薄零落王孫翰墨餘越王臺殿久荒蕪要知人好畫亦好愛比當年屋上烏

附錄次韻

張伯雨

翠竹丹山氣旁礴幾疊香痕經手握何年破鏡飛下天吳淞水翦并刀薄江南寶繪多遺餘王孫不歸恨蘼蕪蕪蕪消歇秋風起班班爲我歌烏烏

又

鄭元祐



宋諸王孫妙盤礴萬里江山歸一握卷藏袖中舒在手清風徐  
來穀衣薄文采於今淪落餘雕闌玉砌淒靡蕪至寶不隨黃土  
化門上空唳頭白鳥

又

陳方

苙衣春暖初盤礴點綴溪山不盈握白雲隔浦見桃花坐使涼  
風起叢薄故物凋零百歲餘王孫有恨迷平蕪衡門今日看真  
蹟始與人辨鳴雄鳥

苦雨行

孟秋苦雨稻禾死天地晦冥龍怒噴南鄰老翁臥不起漏屋溼薪  
愁殺人自云今年八十賸力農一生茲始病兩逢赤旱三遇水租  
稅何曾應王命吾今寧免身爲魚死當其時良可吁

汎滄浪

滄浪可濯纓春雨看潮生斲得木蘭槳欲向桃源行桃花源裏秦  
人住花發綺霞明處處何用文章寄武陵時有漁郎自來去

至正乙巳五月廿三日畫雅宜山齋圖并題

靈巖對直雅宜山穹林巨石臨一作蒼灣若翁遁跡在其麓有子

讀書常閉關松根茯苓煮可握一作林下慈鳥去復還寫圖愛此

錦步障白雲紅杏春闌斑

戲贈東方生

國士腰閒玉鹿盧猛將手中金僕姑英雄往往出屠釣輕薄紛紛  
能詔諛寶劍生塵無所用黃流明月若爲污揚雄枉儼相如賦今

日論兵重武夫

送友之紹興

賀監宅前路荷花今亦無空餘湖上月照見水中蒲送爾作官幽  
絕處錢唐江頭飛柳絮聽事一作臨隄滿夕嵐惟有沙鷗自來去

題張外史翦韭亭

外史詞華耿霜月劍花秋瑩鷓鴣膏皎然光燄照綠水不假雕琢  
慚鉛刀雅音自出性情正庸工徒爲血汗勞若人逝矣不復作稂

莠雨深那可薶

壬子九月十九為潘翁仲暉畫并賦詩右方

此畫在長安中

阿翁好讀閒居賦桃李春風滿庭戶時與華陽道士行還鄰角里

先生住寶淨僧居共齋粥已看富貴如風霧我來三宿夜連牀行

路荆榛歲將暮

泉州兩義士行

孫天富陳寶生皆泉州人

泉州兩義士異姓乃同心同心而同居利矣能斷金不見橫海虹

夢見海畔路夢隨春雪舞迴風思逐奔湍向東注婁江之水汙汙

其波方舟容與遄歸以歌落葉不息飄揚無蹤大風雲飛嗟彼斷

蓬人生乖離式與此同翩翩者鴻飛鳴相隨睽彼儉人我心實悲

兄弟戕賊室家瘡痍背義競利曾弗之思兩士相讓以義其誰似之

清閼閣全集卷之四

清閼閣全集卷之五

七言律詩

送倪中愷入都

酌酒送君遊上京風帆回首闔閭城煙消南國梅花發冰泮長河

春水生太史奏雲龍五色伶倫吹律鳳雙鳴仰觀禮樂夔龍盛好

播聲詩頌治平

送張外史還山

道士朝乘白鶴還樓臺金碧鎖空山半天花雨飛幢節萬壑松風

雜佩環丹井夜寒光剌剌石壇春靜綠斑斑飄然便擬從君隱分

我立洲一半閒

別姚子章都事

不見高人十五年相看兩鬢各皤然酒溫鶯語煩三請椹熟蠶匡

已四眠舞袖醉傲明月下歸心飛度白鷗前練溪儻見韓徵士好

示新圖竹色娟

送徐子素

山館留君才一月梅花無數倚霜晴垂簾幽閣團雲影貯火茶鑪  
作雨聲深竹每容馴鹿臥青山時與道人行歸舟載得梁溪雪惆  
悵鄰雞月四更

送張鍊師遊七閩

高士不羈如野鶴忽思閩海重經過舟前春水他鄉遠雪後晴山  
何處多穀鯨臥雲芳草細鉤輶嘒樹野煙和武陵九曲最清絕落  
日采蘋聞棹歌

聽秋軒

聽秋軒裏聽秋雨定起山僧坐翠微隱隱煙濤搖夜席濛濛花雨  
著人衣驟如崖瀑衝雲落婉似湘靈鼓瑟希六用根塵今已淨松  
篁陰下共香霏

晨起一首寄丹邱

竹窗晨起聞幽鳥深巷絕無車馬喧多病相如一作非不遇歸田

靖節一作陶令自忘言牆陰薯蕷苗方茁雨裏櫻桃花正繁二月冥寒

少晴日漸一作坐看春水上柴門

次錢思復見貽韻

文章傳法似傳燈治病宜求三折肱退食君休大槐國安居我學  
小乘僧業勤已有朋來樂步周能無祖武繩欲挈一壺相慰藉春  
船月色待君乘

東林隱所寄陸徵士

巖扉桃李晝陰陰耕鑿居人有遠心一夜池塘春草綠孤村風雨  
落花深不嗔野老羣爭席時有遊魚出聽琴白髮多情陸徵士松  
閒石上續幽吟

失鶴

啄粟巢松泰華峰直將天地作樊籠不聞丁令歸華表應馭王喬  
入太空行跡縱橫苔石上寒棲依舊竹林中清齋我亦厭腥腐遐  
舉一作長歎思乘萬里風

北里

舍北舍南來往少自無人覓野夫家鳩鳴桑上還催種人語煙中  
始焙茶池水雲籠芳草氣井牀露淨碧桐花練一作衣挂石生幽  
夢睡起行吟到日斜

山園

春水鳧鷖野外堂山園細路橘花香棲棲身世書盈篋漠漠風煙  
酒一觴豈謂任真無禮法也須從俗著冠裳不營產業人應笑竹  
木栽培一作桃栽已就行

林下遣興

眼見藤梢已過牆手拈書卷復堆牀聞臨檻水親魚鳥欲出柴門  
畏虎狼冠製不嫌龜殼小衣裾新翦鶴翎長從來任拙唯疏懶一  
月秋陰不下堂

春日

閉門積雨生幽草歎息櫻桃爛熳開春淺不知寒食近水深唯有

白鷗來即看垂柳侵磯石已有飛花拂酒杯今日新晴見山色還  
須拄杖蹋蒼苔

林下

林深何處尋行徑披草時過野老家練練澄波晴偃月蜿蜿小隴  
曲藏蛇孤帆賣藥來句曲獨木為橋似若耶高臥閉門成懶癖蒼  
苔從滿石尊窪

二月十日立文館聽雨

臥聽夜雨鳴高屋忽憶陂塘春水生何意遠林飢獨鶴若為幽谷  
滯流鶯成叢枸杞還堪采滿樹櫻桃空復情二月江頭風浪急無  
機鷗鳥亦頻驚

對雨寄張伯雨

把酒獨臨溪上雨林深地僻少相過忽與天際真人想欲乞山陰  
道士鵝坐久苔花一作研苔侵袖碧書成簷溜沒階多悠然靜寄東軒  
下日暮徘徊聊短歌

次陳子貞見示韻

漠漠寒煙墟落際，猶餘凍雪鎖荒榛。行隨雲谷采樵者，飯供松龕學道人。未必杜陵渾懶慢，可憐逸少轉清真。酒船好繫一作溪頭石花鳥，相娛行及春。

次韻答郊九成見寄

郭外青山舊結廬，微茫野逕望中無。殘生竟抱煙霞癖，好事猶傳海岳圖。夜壁松風懸雅樂，秋池菊水酌商觚。儻從世外求玄賞，好趁輕舟看釣鱸。一作浴鳧

和虞學士寄張外史韻

華陽上館誰曾到，知有高人避世深。當戶春雲圍紫蓋，洗空花雨散青林。丹臺篆迹龍蛇動，經閣松聲鸞鶴吟。念子離居消息遠，幾將書札寄遙岑。

再用韻

外史棲真何處尋，桐花原上草苔深。星壇醮後雲封徑，仙驥歸來

風滿林丹竈石牀，遺往迹寒松流水續。幽吟虞君傳世琅玕句，千古清標寄石岑。一作虞書傳寶人間，世為有清詩寄碧岑。

贈張景昭

君能不負白綸巾，一作張卿自道古遺民世外尋真狎隱淪。虛閣松聲答笙磬，小山桂樹絕風塵。晨朝絳闕存三景，夜埽青壇禮七真。每御天

風自來去，凌虛好是鶴為身。一作未俗頑仙非所取，清才如子不多人。

送章鍊師入京

五鶴翩翩朝帝京，青童遙侍玉宸一作皇君。倚天樓觀金銀氣，蔽日

旌旗錦繡文。夜禮洞庭薦明水，春陪遊輦望祥雲。何人得似愚溪子，高舉凌風思不羣。

與伯雨登溪山勝概樓

樓下清溪夏亦寒，溪頭箇箇白鷗閒。風迴綠卷平隄水，林缺青分隔岸山。若士振衣千仞表，何人汎宅五湖閒。絕憐與子同清賞，擬向雲霄共往還。

送張貞居遊靈常洞兼簡王晉齋

荆溪山水闕靈宮子晉笙鸞駐碧峰  
午夜月明風滿帳千厓人靜  
鶴眠松綠知瑤草春來長應有仙人  
洞口逢莫為青螺翁久住歸  
時騎取葛陂龍

過許生茅屋看竹

舟過山西已夕曛許生茅屋遠人羣  
鑿池數尺通野水開牖一規  
畱白雲者藥煙輕衝竈出碓茶聲  
遠隔溪間可憐也有王猷興階  
下新移廿此君

答王彝齋

客居北渚靜窺臨霜藻蕭蕭雪滿簷  
玉石在山聊混璞金蘭惟子  
久同心每懷往事悲今事莫棄分陰  
惜寸陰自笑蝸廬無長物窗  
前陶器與單衾

長至後十日蓋十一月十日也獲與德機伯昂二高尚公謹伯  
竟二賢良共詠彝齋有道先生見貽佳製絕歎敦厚優柔得唐  
人句法宋諸老性情也張高尚命即次韻奉和書紙尾所謂以  
狗尾續貂多見其不知量也恕之幸甚是歲乙巳倪瓚再拜

八月廿三日畱南宮岳山人飲明日岳山人過玉山南宮老矣不  
知復幾聚首觀花聽琴情不能堪因賦兼柬玉山

芙蓉著花已爛熳濁酒彈琴聊少停數聲別鵲隔江渚一醉秋風  
空玉瓶況當賓客欲行邁忍使風雨即飄零攀條掇英重惆悵但  
願花下長不醒

在同里懷元用

一水東西雲窈窕幾家楊柳木芙蓉齋居幽閒無人到屐齒經行  
破薛封密竹窗虛秋半雨叢一作楓林寺遠日沈鐘寄詩為道長相  
憶欲話離愁何日逢一作想亦依  
依念去蹤

寄王成夫

茂深閉閣獨焚香那識窮愁客異鄉坐拂朱絃彈綠水狂攜紅袖  
浹清觴春池雨後泉應滿庭樹雲移影更長月燭露帷非予樂五  
湖煙景屬漁郎

乙未歲余年適五十幼志於學皓首無成因誦昔人知非之言慨

然永歎賦此

陰風二月柳依依隱映湖南白板扉旅泊無成還自笑吾生如寄  
欲何歸美人竟與春鴻遠短髮忽如霜草一作藻稀五十知非良有  
以重嗟學與寸心違

三月廿二日雨懷荆溪勝遊寄原道

我昔繫舟尋杜牧荆溪流水落山一作川光春茶已放仙人掌露蘚

渾侵玉女牀酒闌更蹋花閒月舞罷猶彈陌上桑此日狂遊忘且

暮十年回首意茫茫

贈張玄度時方喪內

吳松江水似荆溪九點煙風落日西寂寂郊原寒食過蕭蕭風雨

竹雞嘯蕙花委砌心應折芳草歸途意轉迷曾得魯連消息否春

潮隨雨到長隄

上已

石梁破屋路敲斜僻似華陽道士家漠漠春雲飛別鶴潺潺夜雨

雜鳴蛙閒看稚子翻書葉時有鄰翁汲井花日暮傷心江水綠共  
舟人已躡飛霞

題張以中野亭

人境曠無車馬雜軒楹只在第三橋開門草色侵書幌隔水松聲

和玉簫 榻雲山供夏簟滿江煙雨看春潮君能擷取飛霞佩天

際真人近可招

送德常同知

聞道之官嘉定去載書連舸泊江濱城樓近瞰吳松月埃館微霑

滄海雲宓子風流常宰邑張翰識達更能文亦欲東觀釣鯨手棹

歌秋趁白鷗羣

贈君震

遠愛尋山復好仙鶴歸城郭幾何年靈芝每掇巖前秀祕訣還從

肘後懸松月半空垂羽蓋風湍一壑寫鴟絃擬開精舍當飛瀑一作

懸與爾棲遲日論玄一作唯爾丹

江上作

一作贈友生

江頭二月雨垂垂起濯塵縷水滿池賀監宅前重載酒辟疆園裏更題詩川途幽邈鶴歸遠窗戶虛寒燕到遲忽見故人王架閣夜闌秉燭話余思

燕吳氏樓居

雲松之樓高入雲風起松濤一作松聲十里聞瓊杯綺食行春雨翠

幔朱簾捲夕曛宴遊適當山擁榻醉臥莫遣人書裙西飛白鶴東

歸去回首巢居謝俗氛

九日

自歎不能孤九日一壺濁酒對西山遙憐玉樹秋風裏靜看冥鴻落照閒草木蕭蕭雲更碧山川漠漠鳥飛還長途誰是陶彭澤被褐行吟意自閒

懷歸載都玄敬先生詩話

久客懷歸思惘然松閒茆屋女蘿牽三杯桃李春風酒一榻菰蒲

夜雨船鴻迹偶曾畱雪渚鶴情原只在芝田他鄉未若還家樂綠

樹年年叫杜鵑

雪後過陳子貞隱居

陶公卜宅南村裏快雪初晴思一遊樹辨微茫來獨鶴櫓搖敲側散輕鷗墨池繞溜春冰滿塵榻繙書夕照收相見惘然如有失棹頭吟詠出林邱

贈友

開元道士來相訪索寫雲林春霽圖別我梁溪已二載去濯滄浪徧五湖滿目波容蘸山黛撩人柳眼亂花鬚避喧政欲尋耕釣源上桃花無處無

荆溪卽事

銅官之山溪水南周處廟前多夕嵐看卷雲帆歌白紵勸嘗春酒破黃柑長林獨往誰能覓幽事相關性所耽苦欲避喧那畏虎儻從地主結松龕



顧仲贇過訪聞徐生病瘥  
室裏維摩病已瘳竹爐藥鼎雨聲秋一畦杞菊為供具滿壁江山  
入臥遊舟外鷗波情浩蕩窗間蝶夢思綢繆虎頭癡絕從談諱煮  
茗聊為半日留

雨後

雨後階一作階除泉亂流落花時節綠陰稠石尊貯酒供杯飲素壁

圖書入臥遊騎日長林藏伏虎際天春水浴輕鷗幽居四月饒櫻

筍醉裏題詩一散愁

次柯博士寺壁題韻

初月五日春意動遠水蕩漾情如何鏡中羞見白髮短柳上愁看

青眼多起拂綠琴歌楚調為留明月挂松蘿弭棹溪南一杯酒他

年浪迹儻重過

吳門賦謝陸繼之黃柑紫蟹之貺

闕閭城外皆春水斜日維舟方醉眠攜手故人驚夢裏送書飛雁

落尊前黃柑開裏煩相贈紫蟹傾筐也可憐憶爾獨居湖上宅晴  
窗奇石翠生煙

送甘允從

來尋墨沼雲林下共愛女蘿懸石林喚人鸚鵡語猶澀當戶枇杷

子半黃霜一作奉橘定應題百顆籠轡即欲寫千行蘭亭書法人間

少好去山陰覓野航

鶴溪為張天民賦

溪西松影高千尺白鶴時時眠上頭風雨不驚鷗鷺宿雲霄應與

鳳鸞遊明窗筆格珊瑚樹新釀松花瑪瑙甌露下鳴泉聲徹遠幽

人空谷獨相求

悼頂山清上人

杯渡前溪見水源偶來佩芷服蘭蓀香臺猶帶山窗影經卷長依

松樹根雲起晴峰還有觸雪消春野不留痕倏然我已忘言說翠

竹黃花自滿園

送貞居還山

日暮書傳青鳥使華林瑤草待君歸挾舟婉婉雙龍出背雨寥寥  
一鶴飛秋水琢成蒼玉佩朝霞補作紫綃一作衣山中長史來相  
覓應借窗閒白羽揮

寄貞居及柳太常鄭有道次前韻

華陽外史從幽討谷口高人亦賦歸遙憶愚溪對山坐何時菌閣  
看鴻飛荒荒旭日晡立髮滴滴流泉浣素衣寂寞松窗懸榻處塵  
生塵尾不堪揮

寄王叔明

幾夢山陰王右軍筆精墨妙最能文每將竹影撫秋月更愛巖作

山居寫白雲祕笈封題饒古迹幽襟一作蕭散逸人羣今年七夕

聞多事曝畫繙書到夕曛

薩仲明為丞相府掾時僦居京師名其軒曰半野後買宅延陵亦  
揭是名於軒因信宿軒中賦此贈之

何意開軒名半野身存魏闕思江湖斜侵瓜圃通花藥稍傍薇垣  
近竹梧千里秋風催斫鱠九霄晨露浥飛鳥如今別買荒城宅自  
掃楓林候野夫

送寶南琛往往荆溪碧雲寺兼柬方厓

碧雲林壑杳重重此去風流似簡公春藥確閒湍激下空山蛩響  
月明中結茅擬候芝三秀眠鹿應遺地一弓聞道重居開竹牖待  
予艇子過溪東

八月三日與劉道益連牀夜話風雨淒然五日開霽道益賦詩見

貽次韻一首

扁舟小泊菰蒲雨立論都消身意塵空寂室中無侍者蕭條雲外  
不羈人酒杯畏病不復舉燈火新涼差可親嫋嫋秋風振庭樹綠  
波芳草似初春

別張玄度

歸去荆溪邱壑多松陵浦口復來過清風明月許玄度汎宅浮家

張志和夜雨燈檠歌陸續秋林樹子落杪櫛相逢相別嗟遲莫人  
事多乖奈若何

送張以中由宜興歸金壇

亂後歸來事事非子長遊歷壯心違陶公館裏懷仙友杜牧隄邊  
戀落暉松下白雲初起石草閒夕露已沾衣君今尚有歸耕地顧  
我將從何處歸

甘允從來過溪上將還汝寧賦此奉送

野夫住近青山郭左右雲林無市聲忽有故人騎馬至卽呼稚子  
出門迎虛窗圖史少開筵細雨滄浪同濯纓乍別林居無所賴裁  
詩相憶字敬傾

奉和虞學士賦上清劉真人畫像二首

君向積金峰頂住長年高臥聽松風蓬萊雲近瞻天闕劍佩春明  
下漢宮歸去長謠紫芝曲翩然遠挹黃眉翁標名合在諸天上何  
事置身巖壑中

焚香坐石孤峰月飛佩朝天萬壑風邈爾空歌傳碧落飄然流響  
振金宮神君教服玄霜劑聖主能延綠髮翁共道乘鸞去無迹祥  
雲繚繞畫圖中

寄養正

得君佳句清如玉秋色驚人換物華老境侵尋真有感故園隔絕  
更興嗟一作茅屋烏桤紅明映落霞欲酌一尊澆磊  
塊幾時邀子過田家

送僧遊天台

四明山水名天下師去那知客路遙雪霽驚鷹騰宿莽月明寒鵲  
集疏條坐尋雲頂千峰石歸趁江頭八月潮寄語一作山中光老  
子送賓也合過溪橋

送諸從事之越中

郡廳草色映青衫從事風流雪滿簪最愛長官能化俗因知僚佐  
願停驂右軍宅裏尋苔石賀監湖邊詠夕嵐他日從君覓佳果來

禽青李不須函

贈岳松澗

曾訪神仙五粒松澗泉流澗白雲封林閒蘿葛交青蔓

一作水畔

石一作葛蒲開紫茸煮石有方畱祕訣采芝何處覓行蹤岳君別我

三千歲晚戲滄洲得再一作逢

答邵生

已從鷗鳥狎雲深老我無機似漢陰采采菊花猶滿地蕭蕭霜髮

不勝簪南遊阻絕傷多壘北望艱危折寸心好在吳松江水上青

猿嘯處有楓林

逢張立度

一年不見張立度秋夜吳城忽爾逢清似石湖梅上月瘦於廬阜

瀑邊松白冠緇布前朝服短髮長齋舊日容昔者交朋淪落盡及

時一作埋憂為樂且相從

寄熙本明二首

在山無事入城中每問歸樵得信通松室夜鐙禪影瘦石潭秋水  
道心空幽扉獨掩林閒雨疏磬遙傳谷口風幾度行吟欲相覓亂  
流深澗隔西東

白首遙知得道餘不聞詩思近何如高齋夜雪同誰話古木寒山

獨自居夢裏只尋行去路愁時聊讀寄來書夕陽溪上多飛鳥若

箇能看影是虛

寄錢伯行

斑斑苔砌蕙花消忽憶美人山水遙夢得池塘春草句望殘煙日

晚江湖汀雲沙鳥時同宿野飯芹羹或見招灑埽南湖石上月為

畱清影醉吹簫

居竹軒

翠竹如雲江水春結茅依竹住江濱階前迸筍從侵徑雨後垂陰

欲覆鄰映葉黃鸝還自語傍人白鶴亦能馴遙知靜者忘聲色滿

屋清風未覺貧

送祖芳二上人參禮育王寺光公

四明之山林麓幽育王塔前神光浮一作流湯休賦詩歎寂寞遠公  
結社憶風流貝葉經文白業進曇花樓閣青春幽易履上堂禮足  
已香煙雲霧共悠悠

寄張天民

清溪演漾綠生蘋溪上軒楹發興新只欠竹陰垂北牖儘多山色  
近南津湖魚入饌長畱客沙鳥緣階不畏人愧我萍蹤此淹泊片  
雲回首一傷神

送簡禪師易道

蓮花峰下簡禪師半醉狂吟索賦詩榻上諸僧禪定後水邊高閣  
暮鐘時不堪雨柳縈春夢更惜鐘花對酒卮一作且看書深羨雲  
棲松頂鶴吾生飄泊竟何之

寄陸靜遠

積雨雲林生薜蘿墨池新漲浴羣鵝每懷笠澤從漁釣更擬滄浪

聽棹歌蓮葉滿湖雲掩冉橘花垂戶雪婆娑布帆十幅秋風裏卽  
買湖船載酒過

雲泉小隱爲張德機賦

昕一作朝夕輕鷗傍釣磯幽情一作好山自不與人違琴尊花圃春酣後  
童冠風雪晚詠歸雲一作清臥半閒僧入定苔一作流侵三徑客來稀

卻憐服食清虛甚黃獨松花煮療飢

送盧錄判之建寧

清溪九曲遊人少想見官河一水分理楫初辭季子邑到州好訪  
考亭文簿書閒暇對春雨齋舍蕭條棲白雲洗我明年塵土足扁  
舟亦覓武夷君

寄曹德昭

遙一作苦憶建溪君獨豪一作人五湖春水雲山高丹厓青林紫步  
嶂蜀錦越羅金錯刀已知雅頌播廟瑟無復謳吟悲楚騷伏生衰  
朽見鵬化願同斥鷃巢蓬蒿

賦王真人胎仙樓

紫閣峩峩闕玉文攝衣迎日禮神君  
河汾鳳吹來未泯城郭鶴歸今復聞  
貪看飛裙舞綵繚遙憐風馭散繽紛  
世人政若塵眯目指點虛無疑白雲

過蘭陵宿蔣達善家

蔣翊初開竹下逕野夫聊乘溪上舟  
珍簟敷牀夏冰薄湘簾受風春浪浮  
圍棋終日對急雨解帶六月如高秋  
可憐相過便傾倒就宿爲君少淹留

寄張貞居

不但入城蹤跡少南鄰野老見猶稀  
狂歌鳴鳳聊自慰舊學屠龍良已非  
蒼蘚渾封麋鹿徑白雲新補薜蘿衣  
羊君筆札誰能寄欲讀靈文一扣扉

送徐元度

荷鍾空林春雨餘艤舟江岸燕飛初  
去尋天上仙人佩肯顧山中

隱者居霜月四更提劍舞田園二頃帶經鋤  
蘭榮柳密南簷下仁子雲閒枉尺書

奉懷張外史

陰壑慘慘綠苔生碧雲亭亭多遠情  
松杉鶴去轉蕭瑟洲渚花落自縱橫  
從君下榻住十日看我鼓枻出層城  
洞口菌巢無恙否定應閉閣著書成

寄鄒九成

芙蓉洲渚映江波落日維舟發棹歌  
坐久不知初月墮居謀何處白雲多  
糠粃富貴知吾否簿領風埃奈子何  
几格香材儻持寄熏鑪茶鼎樂漁蓑

初書記以詩來別且諄諄開論深見方外之情  
因次韻奉謝併期面別

從知四大皆假合順境逆途非樂憂夢中妄想驚  
得鹿海上忘機思狎鷗舉世何人到彼岸獨君知  
我是虛舟詩來說法能開論頑

礦無情也點頭

鄭德明新居

傲居吳市仍栽竹挂榻高齋獨待余風引香煙金鵲尾雨添書水  
玉蟾蜍仲舉未應治一室更生何用博羣書繞牀阿堵那嫌俗每  
罄金錢一飯餘

送浙憲掾劉彥文并簡張貞居

落日采蘋溪水綠目追帆影先飛鴻寄書為覓仙人隱種杏今居  
丹井東遠道悠悠宵人夢晴波洶洶盡多風鳴珂使者清無事爾  
得優游羣掾中

寄吳子併懷貞居

江海風流吳孟思十年不見鬢成絲舊同野老松花供今寄仙君  
石室碑秋日滿船初曬藥晴雲浮水獨臨池南山樹裏孤棲鶴爾  
去何當一問之

謝伯理東還訪之不遇走筆奉寄

謝眺宅前山黛濃山雲飛墮墨池中攜家又作他鄉夢歸棹還隨  
落葉風鶴入暝煙愁浩渺鷗浮遠水思清空尋君不遇成惆悵江  
草青青岸蓼紅

寄盧士行

闔閭浦口路依微笠澤汀邊白板扉照夜風鐙人獨宿打窗江雨  
鶴相依異途豈有新知樂老境空思故里歸擬問桃花汎春水船  
頭浪暖鱖魚肥

訓曹德昭

荆溪山水最清遠結屋溪邊住幾年磯底松棲何處鶴村中茶焙  
隔林煙清潭況有王戎勝閉戶仍多一作孫敬賢詩出奚囊一作  
當時寄我琅玕色潤雪濤箋一作長篇短

張貞居有詩柬梁鴻山楊君次韻和之

鴻山東面受朝暎戶牖嵐光晝吐吞梁婦終甘隱吳市戴琴原不  
適一作王門弦歌寂寂虛千載井臼依依自一村一作雪獨

尋楊處士蕭條古道與誰論

杭人有傳余死者貞居聞之愴然因賦以寄之

果園榻孰誰分餉茅屋詩成懶寄將衰謝皆傳余已死迂疏真與

世相忘夜分風雨雞鳴急天闊江湖雁影長寥落百年能幾面論

文猶及重銜觴

霧隱空山秋色一作深茅齋酒熟向誰斟菊花楓葉愁相並澗水

松風伴獨吟洗耳不堪聞俗語醉眠且復罷清琴遙知對月深予

憶忍不題詩慰子心

寄張德常

身世蕭蕭一羽輕白螺杯裏酌滄瀛逍遙自足忘鵬鷗漫浪何須

記姓名石鼎煮雲聽澗雨玉笙吹月和松聲憑君為問張公子曾

到良常夢亦清

十二月廿四日馮高士訪予笠澤旅寓相與遊從累日其操行  
孤削居處簡易有古高逸之風從容話及德常明公學行之美  
與僕交義之篤因言欲以書札枉問以僕深相怪恨遂不復作  
計此無他聽雙鳧讓謗之過也雙鳧以十年前博易之物翻悔

不遂竟嗔恨而去知其動輿議於所識非特執事也鼠輩小計  
僕固不恤但可笑耳王半山面有黑點人教用園荻煎湯洗面  
半山曰天生黑於予園姿其如予何但執事不明之愆則不可  
逃一人譽之從而敬之一人毀之從而怒之可乎執事以為何  
如謹以奉問千萬還示數字幸甚尊君鶴  
溪先生侍問道瓊懷仰之私也贊再拜

寄陸明本索酒

楊柳低昂蕙草青西莊風物一作景似華亭日修長史登真訣夜誦

虛皇內景經玉冊一作牒初標紫臺籍石苔應長新宮銘自慙服食

清虛甚為覓松肪釀百瓶

蕭從善集其師外史張君詩賦贈

葛翁臺上緡經處陸子泉頭試茗時石記只留金菌閣宮銘猶樹

玉津池晚探風雅還心醉謾說曹劉是我師麟角鳳毛勤采拾卻

愁雷電取無遺

贈張楨

憶昨州民饋餼初兵戈阻絕飽艱虞忽驚歸路千荆棘莫致南溪  
雙鯉魚別浦秋蓮明汎汎寒廳夜雨落疏疏青衫從事將軍幕已



覺門多長者車

答德常別駕初夏見懷

隔浦鼉鳴似打衙雲濤城郭夕陽斜汀前露冷魚鱗屋窗裏煙輕

蟬翥一作紗沛澤風雷時遶几談空衣袂不沾花欲分香飯能來

否早晚門前望鹿車一作苦蔭如今只在家

苦雨

冥冥秋雨濕田禾日日奔雷吼怒鼉十里荒涼黃犢草五湖浩蕩

白鷗波直應天地移龍穴未覺階除失蟻窠君子憂民重興感吁

嗟天意欲如何

春日送別余一秀才

翼翼高帆開遠天綠波芳草隨煙絲春林風雨集憂思茅屋琴書

移晝眠文采由來庾信少草聖近誇張旭頭百年聚散如落葉行

客居人俱可憐

西野對雨有懷明本彥準并呈道益

怪雨顛風裂芰荷鷗飛歷亂水驚波便須埽地焚香坐豈有高人  
載酒過笠澤至今能養鴨山陰何處覓籠鵝重陰忽霽猶斜日惆  
悵思君奈若何

贈葛子熙

打碑直入長安道養母還歸白馬峰聞說陰厓畱積雪將尋隱地  
看長松晴窗弄翰山僧對寒澗行樵野鹿逢爲問山中危太朴到  
州應與子相從

畱別王叔明

秋蛩唧唧雨蕭蕭楮穎陶泓伴沈寥此去那能期後會清言聊以  
永今朝溼雲窗裏初温酒白鳥汀前又晚潮故國何人賦招隱桂  
花零落更停橈

十二月四日和德原率性賦雪韻

海宇希微隱一毫行舟冰泺夕停篙愁看寂寂雙峰並細數林林  
亂石高豈有風塵勞白羽謾思文采照宮袍雪融二月溪流合洞

口誰尋千樹桃

題孫氏雪林小隱

天地飄飄一短篷小窗虛白地爐紅脩然忽起梨雲夢不定仍因

柳絮風鶴影褰裊簷上下鹿迹散漫屋西東杜門我自無干請閒

寫芭蕉入畫中

喜謝仲野見過

階下櫻桃已著花窗前野客獨思家故人攜手蹋江路拄杖敲門

驚夢華藉草悲歌聲激烈停杯寫竹影敲斜新蒲細柳依依綠西

北浮雲望眼遮

述感

桑柘蕭條半草萊百年人事哽悲摧沙邱漂母寧復有故國王孫

誰見哀歌吹淒涼銅雀妓世途在苜蓿城災遙知敕勒穹廬野日

夕牛羊欲下來

張德常明公舊有良常草堂在金壇之華陽洞天揭曼碩張仲舉

諸學士嘗賦詩紀勝其後德常宦遊無定居政績顯著今為松

江府判因潘以仁之便輒賦七言一首奉寄

樗散張侯意久疏齋廚服食轉清虛黃初府署標名後碧落仙官

校錄餘海上空濛歸化鶴庭前寂寞有懸魚一作人間繁劇臭如鴛吳松江

水浮青玉聊此飡霞駐羽車

寓齋秋懷次韻三首

渚蒲岸柳望秋零桂樹懸香月影清楚水浮舟歸未得羽觴汎蠟

杯一作酒到手句還成雲松眠鶴樹方遠露草寒蟹鳴不平南郭先生玄

默久猶將諷詠寄閒情

思歸江漢濯塵纓旅况蕭條秋氣清一作况乃秋高氣凜清滿壁山圖初睡

起一簾風雨助詩成遠樹芊芊煙鶴唳飛鳶跼跼暮潮平蒼巒九

疊淙松濕擬畢餘生棲遁情

問我歸期未有程秋光羈思共淒清雪留鴻迹應如幻氈仰龜毛

豈有成破屋逃亡寒燐起故宮基構綠蕪平試聽嗚咽長溝水水

本無情似有情

綠波軒二首

綠波佳思復如何階下清陰芳草多  
爛醉哦詩絃寶瑟閒眠敲枕  
幔煙蘿莫將華髮臨明鏡還寫黃庭換白鵝  
剪取吳松雲錦麗天  
孫機杼隔明河

旅況沿河似夢中孤舟江上白蘋風  
蕭條病起三家墅憔悴天涯

一禿翁蘓底鶴鶴歎鵬飛雷鳴瓦缶棄黃鐘  
憂來直欲窮牛渚河

漢迢迢萬里一作漢

三月一日自松陵過華亭

竹西鶯語太丁寧斜日山光澹翠屏  
春與繁花俱欲謝愁一作病如

中酒不能醒鷗鳴野水孤帆影鵲沒長天  
遠樹青舟楫何堪久留

滯更窮幽賞過華亭

病中懷故友華陽外史次韻

憶昔時雍四海寧華陽外史住南屏  
春愁黯黯懷仙臥幽鳥關關

喚夢醒寒雁歸時鶯出谷園花落盡柳縈青  
傷心南北數千里無

復沙墩長短亭

呈錢復思用前韻

霞滄雲臥養黃靈玉笈幽文護石屏  
一榻松濤金石弄半鐙茶雪

夢魂醒玲瓏泰室生虛白縹緲空歌自始青  
不見仙風雲上過羽

車芝蓋睡亭亭

呈諸友人再用前韻

北窗高臥自清寧煙霧衣裳雲錦屏  
舉世無知心自得眾人皆醉

我何醒黃熊號野兵埃黑白骨生苔鬼  
燐青舊宅荒蕪時入夢墨

池誰訪子雲亭

歸錫麓

未訪西巖墨沼泉東家兒女笑相牽  
莫話艱難長旅食敢忘蕭散

送餘年穉稜雲黃秋雨後芙蓉霜落渚  
鷗邊歸來何異遼東鶴荒

冢纍纍思惘然

二月二十日大風

南渚春風二月狂，停橈濯足聽鳴榔。煙邊去鳥暮山碧，衣上飛花  
春雨香。高柳拂雲依古渡，驚鷗衝浪起橫塘。遠懷不作悠悠語，忍  
躡飛鳧返故鄉。

寄陳庶子

高行昔聞陳太邱，浮雲蹤跡長一作雲行遠遊。丹砂擬訪葛洪井，  
湖水堪乘范蠡舟。爐銀欲變頭先白，田秫可釀行歸休。且排憂憤  
澄神慮，奏刀已覺無全牛。

俊仲明以詩見示次韻謾酬

南湖流水綠泱泱，野鶴同棲秋夜長。短世應須幾緹屐，懷人可但  
九迴腸。驚風零亂芭蕉影，冷雨淒迷菡萏香。高尚劉君此肥遁，優  
游物外久韜光。一作窻知百世有餘光

送柳道傳東歸

賦詩南澗寫烏絲，靄靄停雲去後思。鄉國動成經歲別，江湖復與

故人辭溪船，斫鱸雲生柁。松室聞猿月滿枝，他日重尋言子宅。詠

歌應在一作許暮春時

寄開元長老兼呈鄭明德

遠公令我詩興生，堂下綠苔無俗情。天女試散寶花墜，曲生相逢  
青眼橫。布金已住長老宅，乞食應憐王舍城。何當慧筏一作棹一來  
過，同載唯許鄭康成。

呈良常安遇伯仲

松陵竟失五車書，梅里燒焚舊屋廬。衰季悲吟歎羅隱，盛時作賦  
羨相如。伊優骯髒復何似，臃腫支離聊與居。日日秋風白蘋老，門  
前江水接空虛。

送梁生讀書沈莊

上蔡梁君譜系蕃，凌煙勳業舊諸孫。廬山傍斗可攬秀，大江自岷  
初發源。夜誦庭柯襍琴響，春羹汀藻帶潮痕。休文舊宅宜終隱，歸  
近南湖祇樹園。

題王敬之壁

我來陸莊如故鄉故鄉風景日淒涼解憂幸有盈尊酒慰眼新栽  
百畝秧蒲葉清波閒濯足荷花斜日起鳴榔當年李白成何事白  
髮緣愁萬丈長

寄周履道

兼旬不見周徵士落月空梁夢見之久狎海鷗聊避世虛言市虎  
竟成疑尊前節序梅將玉鏡裏形容鬢已絲日暮煙濤隔城郭蕭  
條南渚一吟詩

寄顧仲瑛

江海秋風日夜涼蟲鳴絡緯促寒一作寒民生惴惴瘡痍甚旅汎  
依依道路長衰柳半敲湖水碧濁醪猶趁菊花黃知君習靜觀諸  
妄林下清齋理藥囊

寄王明卿

不見孝廉踰十年高人風節自居然數閒茅屋無人補一榻寒雲

只獨眠酒榼時須栗里菊茶煙遠煮惠山泉衡門不出棲遲久坐  
有孫登彈一絃

題荆南精舍圖

誰畫荆南精舍圖煙霏嵐翠墨模糊林閒野鹿時相逐洞口山猿  
不受呼尚有流泉悲夜雨已迷幽徑入寒蕪癡人莫彈西飛鶴雲  
外仙君恐姓蘇

題米南宮石刻遺像

千秋遺像一作米公遺像刻堅珉卻在荒煙野水濱絕歎莓苔迷慘淡細  
看風骨尚嶙峋山中仙冢芝應長海內清詩語最新地僻無人打  
碑賣緬懷英爽一傷神

題畫貽王光大

荆南山色青如染上築正當溪水南浪舞漁舟鷗汎汎雪消沙渚  
柳毵毵涼軒楓葉晴雲綴秋浦荷花落日酣舊宅不歸幽夢遠吳  
松聊結小禪龕

用王叔明韻題畫

王郎筆力追前輩海岳新圖入臥遊獨鶴眠松猶警露孤猿挂樹  
忽驚秋陶潛宅畔五株柳范蠡湖中一葉舟同煮茯苓期歲暮殘  
生此外更何求

題松雪墨竹

緣江修竹巧臨模慘淡松煙忽若無亂葉寫空分向背寒流篆石  
共縈紆春渚雲迷思鼓瑟青崖月落聽嘯鳥誰憐文采風流意謾  
賞丹青沒骨圖

辛亥六月三日寓實性源禪房為寫竹梢因賦三首

禪關分榻一作開門便肯留人宿不夜長然禮佛鐙君已風流如惠遠我

聊吟嘯答孫登來依結廬安居者莫厭無家有髮僧清夜哦詩江

月白琅玕節下影鬢鬢

此身已悟幻泡影淨性元如日月鐙衣裏繫珠非外一作不得波閒

有筏引一作要人登狂馳尚覓安心法玄解寧為縛律僧曲几蒲團

無病惱松蘿垂戶綠鬢鬢

殘生已薄崦嵫景猶護餘光似曉鐙立一作懸圍雨雲元不隔華嚴

樓閣也須登夢歸金菌山前路飯仰白雲窗裏僧獨鶴步庭閒顧

影西風吹鬢雪鬢鬢

寫畫贈潘仁仲醫士

屋角東風多杏花小軒容膝度年華金梭躍水池魚戲彩鳳棲林

澗竹斜疊疊清談霏玉屑蕭蕭白髮岸烏紗於今不二韓康價市

上懸壺未足誇

貞居君在餘杭北郭結樓居之號茅嶺行窩予久欲往觀而未能

也茲貞居適有來此之約因寄一首

已向雲林開別墅更聞茅嶺有行窩提魚就煮興不淺看竹頻來

意復多梅隴雪晴紅綴萼墨池水暖綠生波懸知潘令閒居賦不

比陰山勅勒歌

再用韻呈張伯雨潘子素

團團桂樹覆巖阿茅屋歸來雪一窩高臥邱園奇氣在倦遊江海  
故人多楚山白雁遵寒渚練水長魚出素波去去南州書問少寂  
寥誰和紫芝歌

附次韻

扣舷溪子發陽阿落葉霜林見鳥窠清閣閣前春意早蕭梁臺  
上月明多顧瞻鳴雁稻中散仰視飛鳧馬伏波對酒忍思千古  
事潘郎刺促爲誰歌

東友

幽窗談笑話生平屈指年華一作三幾變更白髮滿頭今已老青

山排闥故多情桃花灼灼應無語春雨蕭蕭尚未晴明日扁舟期

載酒南山筍蕨正堪烹

曹伯高爲曹尚書之子以十屈詩卷索題走筆漫應

清貧我早識尚書身沒韓公爲結廬可但家聲今不替猶趨禁直  
未全疏窗臨墨沼揚雄宅郭暎雲林謝眺居共愛諸郎遊息地風

零閒詠暮春初

陽春堂

陽春堂下春波綠臘雪初消蕙草青未覺避喧離世俗也知習靜  
愛郊坰欲爲野逕孤琴約盡醉華筵雙玉瓶見說陶朱有遠趣長  
松傾蓋碧亭亭

風雨


風雨蕭條歌慨慷忽思往事已微茫山人酒勸花閒月秦女箏彈  
陌上桑鐙影半窗千里夢泥途一日九迴腸此生傳舍無非寓謾  
認他鄉是故鄉

附次韻

張羽

看畫哦詩重慨慷百年翰墨付微茫已憐揮灑如摩詰可忍悲  
歌似子桑名世幾人稱妙手舊遊隨處擾愁腸雲林故事惟文  
藻遺跡偏多在遠鄉

清閼閣全集卷之五



清閼閣全集卷之六

七言律詩

屋漏

寂寞江天暮色懸重陰愁絕卷塵編走看破壁雨沈竈思臥蘆花

雪滿船風卷高一作隄沙高樹拔泉翻野援藥苗延青山天矯

浮雲外白愛新秋爽氣鮮

贈惟寅

有引

陳君惟寅天倪先生令子也天倪為黃清權高士之甥清介孤峭甚似其舅讀書鼓琴不慕榮進澹泊無欲以終其身惟寅能守其家法者也世故險巇安貧自樂窮經學古教授鄉里色養得親之歡心友愛盡弟妹之和樂綴詩文於以自娛余嘗愛其藻麗不羣飄然有出塵之想聊摘鄙語用詠以歸美焉

不見元方已隔年暮春孤坐此江邊政憂浪闊多風雨卻喜君來

共簡編諷詠新詩非偶爾艱虞遠別更淒然看花相約重過此已

放柳條維酒船

曲彥遠寄茗裹賦此道謝且求致梨栗木瓜



遶屋青山謝眺居木瓜梨栗種扶疏不妨暇日騎官馬自喜清時  
少簿書九月授衣霜欲落百年回首雁飛初猶憐踽踽空山客茗  
裹封題遠慰予

故吾

縹緲青山日欲晡瀾漫秋水興何孤鶴歸城郭生新夢塵掩圖書  
尚故吾南畝藝苗傷碩鼠北窗臨碣聽嗚烏醉歸儻乞封侯地便  
復移家傍酒壚

三月二十二日雨懷荆溪舊遊寄原道

憶昔荆溪棹酒船綠波搖蕩女蘿煙春茶未放仙人掌雨蕨先舒  
稚子拳巖閒石上尋遺跡作賦題詩多昔賢今日空齋獨對雨幽  
懷猶夢白雲邊

訓友生

泖水山光照屋廬每思潘令賦閒居客愁不解連三月詩贈全勝  
枉尺書醉墨不妨拈秃筆狂吟時復近前除亂離自歎摧頽甚晝

寢毋嗔老宰予

二月晦日聽劉伯容彈琴

遠思翩翩屬五湖一杯濁酒詠唐虞清琴忽作金石弄佳士今猶  
山澤臞飛絮遊絲颺風日瀑流松吹灑巾襦羣龍汨溺淫哇久古  
樂蕭條古道迂

答元用

野水浮鷗不世情煙濤漂泊羽毛輕雲移短棹無機久雪點青山  
照眼明甫里宅邊逢酒熟吳松江上看潮生夫君爲話征途苦惆  
悵令人意不平

同通書記過鄭先生舊宅

女蘿垂綠翳衡門野水通池沒舊痕有道忘情觀物化清言如在  
想人存淒涼江海空茅宇慘淡煙埃委石尊一奠山泉薦芹藻古  
心寂寞竟誰論

馬國瑞東臯軒

未羨勳名馬伏波優游鄉土樂婆娑輕舟陌上山堪數細雨籬邊菊未過一作浩蕩五湖鷗夢遠蕭寥萬里鶚情多寒宵偶伴一作有幽人宿月燭藜牀一作幔綠蘿

次韻張榮祿追和楊別駕賦玉番陽東湖勝遊四首呈雲浦耕雲二君

祇今誰是番陽守別駕題詩凡幾春僚屬得才青瑣舊兒童騎竹白頭新當筵意欲凌雲外今日人誰問水濱陳迹寥寥風景換桃源何處覓遺民

賓客從來逸興多雨深春渚綠增波笙簫載月迴鸞鶴雲錦飛羣織菱荷短世悠悠大槐國餘哀嫋嫋竹枝歌湖山寥落行人老翠影蒼煙寒蕩磨

散亂鳧鷖發棹謳波明雲淨宛如秋酒杯青落垂楊影塵尾風生杜若洲匣裏鳴琴俄復掩杯中覆水竟難收白頭聞說開元盛雙淚滂沱似瀑流

湖上晚風明綺霞春雲覆竹影交加歌喉圓滑吟山鳥舞袖低徊亂渚花綠淨碧虛寧敢唾星垂河注欲乘槎玉堂坐想當時勝榮祿詩成謾自誇

贈王文靜  
靜寄軒中酒一罇陶然醉裏別乾坤碧桃花已當窗發翠竹陰須映戶繁荏苒春光逐風雨婆娑歲晚樂邱園說說更祝益斯羽若欲宜男贖種萱

和王子明韻  
從俗浮沈多厚顏醉筵舞袖作弓彎雉羅孰是逃三窟豹管能窺見一斑縱酒已拌時共棄歌詩猶與世相關采薇巖穴聊終隱林下閒雲自往還

送盛高霞  
霜髮飄飄鶴上仙相逢遼海幾何年種桃遂有劉郎賦鼓瑟寧知曾點賢華表不歸塵汨汨吹簫何處月娟娟嗟余百歲強過半欲

借玄關一作窗靜學禪

陸文玉見過時余初喪長子

荆溪二月春風惡燈火論交夜對牀白鶴遶壇初露下碧梧滿地

忽霜黃十商失子人誰弔阮籍窮途只自傷政使陸郎能慰藉賦

詩懷舊更淒涼

贈道士李嘯虛

龍虎巖前李鍊師幾時飛鳥洞庭睡晴天白鶴興閒遠秋水蒼龍

光陸離山中杏熟從收穀階下芝生看弈棋邂逅樓船海上便還

應與爾道相期

送霞外師過磧沙寺因寄鄭博士毅長老

湖水東邊磧沙寺繙經室裏看爭棋食馴沙鳥巢當戶坐愛汀雲

影入帷惠遠向修爲律縛康成終老只書癡寄語山靈莫疑怪松

陰好護中興碑

次韻贈林泉民張孟辰

三徑誰尋二仲蹤一邱木石紫溪翁思尊張翰有清識閉閣茂深  
多祖風午夢池塘春草綠輕陰窗戶落花紅應懷錫谷林泉勝山  
色依依在望中

送葉道士東歸分得懸字用韻三首

愁心黯對夕陽懸忽見高標喜欲顛似與人民千歲隔更詢耆舊

一悽然青燈綠酒看成醉祕篋珍圖自滿船歸去還臨劍池月定

應歌此酌山泉

憶爾心如旌旆懸相逢泐渚欲華顛窮冬風景吾衰矣落日煙濤

思渺然八詠樓前思舊宅三高祠下覓歸船棲幽定洗塵喧耳膾

吸東陽一斛泉

君到茅簷雨溜懸采芝期我碧山顛掀髯一笑非徒爾隔世重逢

豈偶然沙渚屐聲歸泐客晚潮帆影下江船爲予一話艱危際雙

淚沾衣似迸泉

贈別榮子仁

退食從容下玉除當年史館燦成書藝場馳騁答賓戲筆陣縱橫  
賦子虛山水娛情經亂後圖書連舸渡江初君來愧我無供給一  
勺寒泉薦菊菹

雨中在林氏賦贈徐生

終朝風雨洗炎歊隱几無言思沈寥已絕鳴蟬咽衰柳空吟翡翠  
集芳一作蘭茗嘉魚坊裏多名酒碧鳳橋邊欲晚潮二子翩翩一作林徐

有高致爲陳筆墨遠相招

戲題嚴錄事所集書畫齋

兩館畫逢嚴錄事手持書畫索題詩金題玉躡齊梁迹墓刻厓鐫

秦漢碑把玩始驚繁卷軸品量還愧拙言詞古人冷淡今誰尚謾

葺殘編慰所思

以龍尾硯寄錢徵士

龍尾誰磋古硯池庚庚立壁隱風漪知君筆力能扛鼎愛我雲腴  
欲產芝投贈寧論百金直詠懷更賦五言詩唯應洗濯寒泉潔靜

試松媒獨下帷

宿清流堂

衍慶院中無市聲清流堂上晚風清一派濁涇從污染白灘白月  
見空明我性非澄本爾淨外塵徒擾元不驚恆公宴坐清涼海還  
許遊人來濯纓

題畫送僧

用大機吳人也住宜興保安寺壬子九月十九日將還  
山戲寫秋樹筠石并詩以贈之且以呈方匡禪伯云

不到荆溪三十秋南津溪水亦東流用公近住金鵝嶺魏族猶鄰  
白虎邱楓葉爛斑霜落後竹枝蕭瑟渚邊頭歸逢古德方厓叟爲  
話談玄舊日遊

夜宿張判府環綠軒贈玄度

戊申十月十八夜環綠軒中借榻眠舞影霜筠風細細縈窗素練  
月娟娟此生寄迹雁遵渚何處窮源漁刺船染筆題詩更秉燭語  
深香冷思淒然

子章號夢庵走筆題

夢庵春夢幾時醒  
隱約江湖且寓形  
愁見亂離心忽忽  
迹疏親友淚熒熒  
松陵遇我才經宿  
浙水歸舟且暫停  
蕉鹿紛紛何得失  
霞明煙外數峰青

江上遇楊德朋

吳淞江上米家船  
邂逅龜蒙舊宅前  
政似燕鴻交汎汎  
聊憑楮穎度年年  
糟牀滴雨誰沽酒  
破衲蒙頭獨坐禪  
莫學山僧空載月  
主人情重更雷連

題春山高士圖和韻

扁舟溪上數來過  
白髮殘春奈我何  
柳絮如煙迷曉浦  
杏花飛雪點春波  
林扉有客圖邱壑  
石室何人帶女蘿  
欲和華山高隱曲  
羈愁悽斷不成歌

過桐里

依微桐里接松陵  
綠玉青瑤繚復縈  
爲詠江城秋草色  
獨行煙渚

暮鐘聲黃香宅裏  
畱三宿甫里門前  
過幾程借書市藥  
時來往未

一作許居人識道一作姓名

寄陳余二校書

吳松江水碧沄沄  
忽憶江城一作陳余兩隱君  
酒艇時搖夜濤月  
書帷

影亂晴窗雲一貧  
老我長爲客二仲  
英賢已著文何事  
雙魚俱寂

寞立一作清言經歲不相一作況聞一作使余聞

宿普度僧舍

悲涼華屋總荒墟  
人事乖張已久如  
兩部草池蛙鼓吹  
一襟桐露鶴階除  
狂遊且盡餘生酒  
宿習猶存半舸書  
初日輕煙棹歌去  
江潭柳影亦蕭疏

贈姚掾史

相府共推三語掾  
卜居曾占九龍峰  
美髯不獨如靈運  
佳句仍兼似鮑溶  
我有茅齋當絕壁  
時看晴雪落長松  
因君喚起故園夢  
彷彿三生石上逢

賦居延王孫德新小隱軒

志隱靈須分小大不論塵市與山林橘中之樂固不淺壺裏有春  
藏更深弈戲自能忘世事酒尊聊用散冰襟莘耕巖築苟無遇豈  
有朝堂論道心

次德機韻

一作賦德機  
荆南精舍圖

溪上田園定有無愁將歸思畫成圖春林寂寂花開落風牖泠泠  
鬼嘯呼尚有流泉悲夜雨已荒幽徑人寒蕪何當一舉同黃鵠未  
覺山川路鬱紆

別彥貞

空齋風雨話連宵歸夢不知山水遙鶴遠城荒嗟寂寂香霏鬢影  
共蕭蕭市中乳虎人三語鐙下寒菹酒一瓢無念百年聊樂爾海  
鷗飛去定難招

挽鶴溪張先生

子述孫承久熾昌薦饑多施活人方句金壇下良常洞白鶴溪邊

世壽堂孔壁遺書覘古學祇園法藏溢神光乘雲笑謝人閒世九  
秩逍遙返帝鄉

首夏卽興呈貞居

鵝鴨如雲散碧漪來禽青李壓低枝深林汲澗常聞虎清晝焚香  
獨下帷路出城東無十里燕來堂上不多時可憐稚筍都成竹忽  
見春蠶已吐絲

寄盛高霞

不見情親踰一載素書到手淚滂沱仙人蛻骨煩重瘞去鶴思歸  
忍再過墓左碑隨煙燼冷手栽松斷斧斤多知君欲話悲辛意慟  
哭爭如後會何

題畫貽王光大

荆南山色隱晴湖暖翠當窗不用圖避世移家今十載盛書連舸  
泊三吳可憐畫卷撩歸夢依舊香奩傍藥爐珍重故人王架閣筆  
能扛鼎要人扶

寄白石

傲屋淪盟也任渠爭巢野鵲厭鳩居人情轉劇空懷土家具無多  
莫借車踽踽獨行良不易紛紛薄俗竟何如波瀾翻覆從千變道  
眼遐觀熱惱除

送杭州謝總管

南省迢遙阻北京張公開府任豪英守臣視爵等侯伯僕射親民  
如父兄錢廟有碑刊夜雨岳墳無樹著秋聲好將飲食濡飢渴何  
待三年報政成

丙午十一月十九日避湖上丁未十二月十六日始去此至陳溪

分湖閒矣因寫喬柯竹石并題

柳渚淹留再煥寒移居何處卜林巒可憐產不能恆業聊復心隨  
所遇安船底流澌微浙浙葦間初日已團團故人存沒應難訪愁  
裏題詩強自寬

寄錢伯行

春雨斑斑長菊苗坐憐依砌蕙花消此時行逕泉侵溼閉戶哦詩  
江怒濤一作動搖政爾清虛忘世傲不妨貧賤使人驕下帷寂寞錢徵  
士艇子看花許我邀

題本中峰觀蓮像

東南唱道據禪林諷詠蓮心契本心善矣不塵仍不染美哉如玉  
復如金三周妙法耆闍崛十丈開花玉井岑今日仰師猶古佛風  
波回首一長吟

呈良常

無家已老復何歸碧樹團團尚夕暉清越風湍帝子瑟縱橫隴畝  
僧伽衣世波汨溺毋溷我節序炎涼且息機白鳥汀前坐來久泉  
侵野徑暮依微

寄朱府判

明月娟娟夜二更挑鐙孤坐不勝情尊前舊恨多年積枕上新愁  
何處生已作閒雲孤鶴去不堪隨柳傍花行使君爲省春田出可

念憂時老釣畊

清明

江雲籠雨白煙生愁眼看花淚溼纓可惜紅英滿芳草又經上巳  
復清明漂漂羈旅燕鴻迹昵昵愁思兒女情老鶴莫教塵土浣碧  
巖松下紫芝榮

寄徐季明

海虞山下徐公宅修竹長松左右栽陳榻待君時一下故園有客  
莫驅回至今清夢依依在欲寄新詩草草裁自是漫郎嫌俗子也  
應魚石有蒼苔

學書

幾叢枸杞護藩籬一徑莓苔臥鹿麋獨許陶泓爲密友更呼毛穎  
伴幽棲野鷺家雞成品第來禽青李入書題臨池自歎清狂甚直  
好還同鍛柳嵇

贈范堦

范公文杏園西宅喧寂一塵還一作異宜鼓琴深林調清越讀書  
稚子聲唔伊簾旌不動香如霧硯席生涼雨散絲欲飲寒泉錫麓  
洞暫違清賞一題詩

題鄧氏扇上

鄧家層軒留十日陸郎酒船來百回蓴羹鱸膾亦已甚冰甌雪碗  
何爲哉江雲飄飄委坐席岸柳垂垂落酒杯飲酣戲寫齊紈扇山  
河微影月徘徊

李文遠製墨次吳寅夫韻

潘衡墨法老坡傳承晏昆仍又幾年獨依山室燒桐子贈與仙人  
寫內篇石竈霞光存活火夜帷雲影炫晴煙要知文字遺不朽猶  
向詩中詠墨仙

贈墨生吳善

吳生製墨變潘法住近義興山郭中洗玉巧當前澗水采花還覓  
古時桐照夜虹光鐙隱壁拂雲鸞尾谷生風長年圭璧富潤屋我



善養生那有窮

贈墨生沈學翁

沈學翁隱居吳市燒墨以自給所謂不汲汲於富貴不戚戚於貧賤者也煙細而膠清黑若黠漆近世不易得矣因賦贈焉

桐煙墨法後松煙妙賞坡翁已久傳麋角膠清瑩玄玉龍文刀利  
淬寒泉山廡唯珍白鵝帖雲窗誰錄古苔篇愛爾治生吳市隱收  
煤一室數鎗然

四月廿八日蓬屋題

江湖風雨夢頻驚舟楫沿河莫計程不幸乃今成大幸有生真亦  
似無生邇生自足賢賓主岑氏誰言好弟兄世故愛憎從毀譽一  
杯聊復暢幽情

擬賦岳鄂王墓

耿耿忠名萬古留當時功業浩難收出師未久班師急相國翻為  
敵國謀廢壘河山猶帶憤悲風蘭蕙總驚秋異代行人一灑淚精  
爽依依雲氣浮一作荒墳落日重回頭

再二首

姦任忠誅轉繆悠鄂王固豈為身謀中興可望隳成業南渡何心  
報敵讎廢壘山河猶帶憤悲風蘭蕙總驚秋莫言當日民遮哭更  
使他年過客愁

丹楓落日隱荒祠蕭瑟清秋志士悲復國豈期讒賣國出師何遽  
詔班師少康一旅應無計李牧多功徒爾為汨汨江流寫餘恨可  
憐宋祚亦終移

盧公武甫當世衰道卷之際獨能學行偉然不但賢於流俗而遂  
已不愠人之不知嗜古金石刻辭汲汲若飢渴隱居婁江之鹿  
城澹泊無營若將終其身焉命予賦鹿城隱居詩因賦

避俗龐公隱鹿門鹿門靜亦絕塵喧釣綠水北菰蒲渚窗俯江南  
桑柘村書蠹字殘繙汗簡石魚名古刻窪尊地偏舟楫稀來往獨  
有煙潮到岸痕

和甘白先生樂圃林居二首甲寅六月五日

清集六  
關關幽鳥綠陰濃林隕陂池曲曲通荷雨逗涼侵北牖汀雲度水  
迅南風清琴詠雅寧諧俗濁酒攻愁似有功聞道秋來偏起蚤一  
簾晨露引高桐

竹裏齋廚柳下渠幽林風景自應殊家無甌石惟憂道鄰斷炊煙  
急索租山水巍湯聊足樂雨雲翻覆豈吾徒蘧蘧栩栩天涯夢楚  
水湘雲叫鷓鴣

十六日夜聽甘白彈琴

溽溽夕露淨衣巾虛牖琴聲向夜分變雅變風由正始江濤江雨  
洗炎氛煙中雉雉登春木石上猿吟隔嶺雲山意寂寥知者少匣  
藏無使世人聞

廿八日又一首

白蘋風起日初沈露坐鳴琴望碧岑七月炎熯已流火一聲冰玉  
落空林胡沙幽結嬋娟恨飛佩空遺縹緲音清景娛人羣動寂冷  
然真足洗予心

貞壽堂爲吳縣尹楊彝作

貞壽堂前風日遲天寸草答春暉兒兮事育心無忤母氏康寧  
志不違後日腰懸季子印只今身著老萊衣熙然鶴髮照綠酒金  
鴨火温香靄微

因儒者董惟明至荆溪輒寫贈別士元鄉契一詩以呈厓翁知己  
承數念及恐欲知近況何如耳

古德乖違已數年相逢吳苑話迤邐木魚晨粥同僧赴仙掌春茶  
破悶煎采藥童歸隨買市眠松老鶴伴棲禪語離更問余何適思  
屬江雲浦月邊

寅高士

兩到幽居不一逢青苔行徑白雲封敲門自看池上竹悲嘯更倚  
風前松足疲塵土三伏日思屬雲屏九疊峰解帶牆陰憩孤寂暮  
歸林下已鳴鐘

野舟西堂吾鄉之英才也辛酉冬仲邂逅於簡村蘭若爲寫江山  
夕照圖并詩以贈野舟又號牧菴故云耳

鵬搏鯤化未逍遙大呂黃鐘久寂寥燕處邱園真足樂貪愚海賈  
定難招能禪豈復沈空寂善牧宜當犯稼苗逢著吾鄉閒老子地  
爐連榻話連宵

題陳虛碧畫

虛碧眞人物外遊尚遺餘跡雪鴻洲城荒鶴怨無窮恨雨駭風驚  
滿眼愁紅樹青山棲白鳥碧花翠蔓引牽牛我來彷彿三千歲清  
淺蓬萊幾度秋

八月二日雨涼寄道翁親契

飄飄江雨沃秋陽戢翼幽禽葉底涼庭砌苔滋連竹淨陂塘荷氣  
勝花香結茅何處足松木歸夢遠林餘礪岡惆悵同心阻攜手掩  
扉山室聽鳴螿

畱別道翁二首

一室蕭閒無市聲浦雲沙鳥到階庭朋來直諒惟三益心醉離騷  
與六經曠世有懷頭已白經年不見眼猶青江村又作思君夢睡  
起長吟月滿汀

綠雲幽思接飛猱與子乖違更鬱陶門掩候蟲秋寂寂窗鳴風柳  
夕騷騷滄江波外孤帆舉大華峰顛一隼高歸去青苔黃葉落託  
鄰樵牧共遊遨

題顧定之爲周正道寫篔簹圖

蕭蕭瑟瑟一林風寫與城東拙逸翁石室先生仙去遠虎頭孫子  
獨稱雄霜毫淡墨陰晴外曙月寒窗夢寐中對月懷人一悲慨雪  
泥蹤跡似飛鴻

和拙逸翁謝惠紙扇之作

楮箑輕於一葉桐淒淒懷袖灑溪風吟搖楊柳春煙綠醉障荷花  
落日紅疑是片雲飛忽墮修成寶月樣偏同美人半掩歌脣小翠  
黛清眸莫惱公

次拙逸叟立春韻

雪泥蹤跡歎飛鴻  
逐逐馬牛千里風  
去日年光悲少壯  
中星時節自西東  
園梅破臘花渾白  
詩老逢春語更工  
獨有無家霜鬢客  
寒廳咄咄坐書空

題周遜學天香深處卷

城柝嘯烏風滿裳  
月明琪樹影侵牆  
霏微露下琴尊淨  
鬱勃胸中書傳香  
山隔浦城迷去雁  
草荒吳苑泣寒螿  
黃雲堆逕無行跡  
幽思迢迢夢故鄉

次遜學道經錫麓懷外家韻

九龍峰色葉蒼茫  
雲臥西溪夢洛陽  
鴻漸草堂泉石在  
春申祠宇草苔荒  
千年仁術傳鄒孟  
萬里風煙壯帝鄉  
欲覓外家成惆望  
船窗風雨灑微涼

一菴大士舊雖識  
未深相知庚子二月十四日復訪之於壽明即畱三宿挹其風標聽其言論始知古德師也余恐其慈忍拯溺

之心過甚未即深僻幽閒之地乃寫竹梢并賦以撼之云爾十  
六日懶瓚和南

壽明寺裏連宵話  
震澤汀前永日畱  
雨葉風梢愁寂寂  
陶泓毛穎思悠悠  
蓬萊莫道仙人遠  
兜率還同大士遊  
乞子玉窗清鳳尾  
能從歸掃白雲不

壬子正月廿三日邂逅芝年講主於婁江朱氏之芥舟軒中芝年  
熟天台之教旨嚴菩薩之戒儀七遮旣淨一乘斯悟與語久之  
斂衽敬歎因寫圖賦詩以贈

優鉢曇花不世開  
道人定起北巖隈  
遠山迢遞窗中綠  
垂柳低昂水次栽  
丈室淨名禪不二  
三生圓澤夢應迴  
閒雲野鶴時相遇  
草新詩爲爾裁

七月六日雨宿雲岫幽居文伯賢郎以紙索畫因寫秋亭嘉樹圖  
并詩以贈

風雨蕭條晚作涼  
兩株嘉樹近南窗  
結廬入境無來轍  
寓跡醉鄉

真樂邦南渚殘雲宿虛牖西山清影落秋江臨流染翰摹幽意忽  
有衝煙白鶴雙

畱別勝伯徵君

清修卓行虞徵士食粥三年致母喪詩法道園能入室畫傳洪谷

早升堂獨高落落松筠節不逐悠悠鷓鴣行此日別君江海去波

光鷗影思微茫一作孤帆回首指斜陽

寄惟允

我別陳公才五霜未應髮白視茫茫句哦夜雨懷無已冠著方山

似季常夏沼已浮蓮蕊碧春衣猶怯樹陰涼久知服食清虛甚更

試山翁煮石方

題安處齋

湖上齋居外史家淡煙疏柳望中賒安時爲善年年樂處士謀身

事事佳竹葉夜香缸面酒菊苗春點磨頭茶幽棲不作紅塵客遮

莫寒江卷浪花

送虞勝伯之雲間求先世遺書

虞勝伯徵君隱居行義家甫里垂二十年不以姓名求知於時  
之閒人遺園先生其從叔也先世雍公遺文道園先生欲求  
而不可得勝伯必欲以意購取之可謂有志而不忘其所自矣  
聞此書藏松江俞子中推官宅推官沒已久而子俊州尹其弟  
能假以歸勝伯非仁人義士之存心乎州尹吾故人  
也因書以歸勝伯非仁人義士之存心乎州尹吾故人

州谷泐泐近水波雍公勳業未消磨況當異代求文字尚有聞孫

校舛訛京國不聞收汗馬草萊終見沒銅駝誰陳聖主賢臣頌奈

爾陰山勅勒歌

上平章班師

金章紫綬出南荒戎馬旌旗擁道傍奇計素聞陳曲逆元勳今見

郭汾陽國風自古周南盛天運由來漢道昌妖賊已隨征戰盡早

歸丹闕奉清光

次韻畱陳叔方早春見懷二首

隔江山翠晚依微隱映江邊白板扉事往依依驚歲改老來念念  
覺前非已看庭草侵行徑漸有汀花拂釣磯慚愧詩篇慰幽獨白

頭從此莫乖違

清夜哦詩手自書也應把燭倩官奴瘦牛犖荒田隴肥馬蹒跚  
笑瓠壺且釀松花江水碧更分煎木嶺雲腴人間誰覓玄真子春  
雨扁舟釣綠蒲

贈周校書

中元習靜松江渚回首塵埃多厚顏富貴不如長處賤奔馳何似  
得心閒參天竹樹存貞碧動地波瀾任往還輸與荆溪周處士避  
人探道掩松關

西神山行

載錫山志

昔在九龍雲霧中泉邊蠟屐徧行蹤南樓明月看時好西澗故人  
行處逢亂後不聽驚鶴錫夢回猶憶下堂鐘休兵即欲幽棲去見  
說禪房膝可容

送朱善良

之子才華足起予迴如明月麗清渠方誇道韞哦春雪已見梁鴻

挽鹿車榕葉擁厓山店遠海濤喧枕夜城虛明年好鼓澄江柁歸  
奉江波雙鯉魚

老唐有詩見寄謂冷淡無錢覓即欲返棹豈知不冷淡而冷淡中  
有温甘者存焉

春風春雨不勝寒江路無泥雨即乾干樹梅花明屋裏一痕山翠  
出林端高情不許庸人識俗眼何從妙畫看若對陶公談世利唐  
公可謂沐猴冠

易尚賢赴鮑郎場司丞次王叔明韻

江山寥落白雲飛城郭煙濤獨鶴歸碧落輕帆來縹緲夕陽遠樹  
見依微熬波霜雪良艱苦富國魚鹽果是非猶歎蝸牛廬底客焜  
黃時節尚絺衣

白馬寺通長老修圓覺期化緣

惠遠深心白蓮社湯休麗句碧雲篇懺摩不懈香鐙供般若仍通  
文字禪雨後春池芹細細月明寒渚竹娟娟東林門外聞鐘返惟

有陶公妙入玄

至正九年八月十六日計籌山呂尊師訪予蕭閒館為予言顧仲

瑛徵君玉山隱居之勝輒想象賦長句以寄他日尚同袁南宮

攜琴嘯詠竹閒也

解道玉山佳絕處山中惟有呂尊師已招一鶴來庭樹更養羣鵝

戲墨池松風自奏無絃曲桐葉新題寄遠詩若許王猷性狂僻徑

來看竹到階墀

別章鍊師

方舟共濟春江闊訪我寒煙菰葦中鼓柁斜衝蕢葉雨鉤簾半怯

杏花風仙人壇上芝應碧玉女窗前桃未紅擬趁輕帆數來往縹

壺不惜酒如空

送盛道士遊越

浙東山水隔層雲雪霽千峰曉不分蕭瑟松林疑鶴語縱橫苔石

見羊羣昔聞陽洞啓神祕中有仙人畱玉文羨爾尋真不辭遠好

隨煙霧挹飛裙

送元白上人往中竺

求法高僧何處去向中天竺最高峰飛鳥欲沒天低樹杖錫應投

湖外鐘半席白雲臨碧澗四更落月挂長松定回依約三千歲若

見拈花紹遠宗

因吳國良過玉山草堂賦詩奉寄

玉山樹色隱朝陽更著魚莊近草堂何處唱歌聲欸乃隔雲濯足

向滄浪珍羞每送青絲絡佳句多投古錦囊幾問掉船尋好事辟

疆園圃定非常

昔張外史有古銅洗種小蕉白石上置洗中名曰蕉池置積雪軒

西園老人追和張劉二君詩書挂軒中余亦為之次韻

雪中芭蕉見圖畫蕉池積雪終凋零風翻窗裏浪花白雨壓牀頭

雲葉青詩人超軼有遠思造物變幻難逃形爾亦林居喜幽事曉

浥石溜攜銅瓶

題良夫遂幽軒

來訪幽居秋滿林塵喧颯可散煩襟風迴研沼搖山影夜靜寒蛩  
和客吟危磴白雲侵野屐高桐清露溼窗琴蕭然不作人間夢老  
鶴眠松萬里心

贈茅山陳太虛

三茆山色隱晴空君住華陽第幾峰陰澗石梁懸帶竦曉窗雲氣  
結芙蓉南遊白拂凝塵久西去青牛何處逢歲晚棲息足松木遲  
子飛屨往相從

題朱澤民爲良夫作耕漁軒圖

寂寂溪山面碧湖輕舟煙雨釣菰蒲曉耕巖際看雲起夕偃林閒  
到日晡漢書自可挂牛角阮杖何妨挑酒壺江稻西風鱸膾美依  
依蓴食待樵蘇

和正道哭外孫張汶二首

幼能爲學日劬書一病兼旬遂隕軀已怪飛來坐隅鵬俄驚斃此

渥注駒窗閒夜雨青鐙曉庭下微霜碧樹枯谷鳥呼兒聲慘惻傷  
心慈母體爲痛

富貴壽夭柄誰操造物無情偶自遭病葉辭柯驚宿雨殘鐙照室  
斂餘膏外翁攜幼情如失慈母思兒夢亦勞忍聽風前泣幽咽城  
樓吹角月當壕

送賴善卿采詩

陳詩昔在周盛日刪詩已是衰周餘祖述孰能加四始研窮我已  
後諸儒嗟子用意亦勤厚聽音知政非迂疏願排閭闔獻采錄坐  
變四海如唐虞

題本立中上人雲山望松圖

西望雲山何處亭鶴歸松枯秋冥冥上人不廢蓼莪句山室長書  
貝葉經未應佛法外孝弟定感仙手鐫碑銘過家上冢世代隔慟  
哭亭前蘿月青

次孟辨見寄兼柬立中蘊中二大士



江水空青好卜居會衝春雨過平湖雲山欲覓無聲句花果誇傳  
沒骨圖莫倚陸機曾入洛最憐張翰獨思吳本瓊二士平安否應  
共清吟對酒壺

贈述首座

述也嘗爲第一座袈裟曾染苾芻尼烏鳶翔舞隨施食龍象森嚴  
聽白椎歸錫湖崩沙際路晨飡筍苗岸邊籬何當就子西汀樹著  
我輕舟一暫維

九日田舍小酌

身世浮沈如漏舟師亾道喪獨悲秋蚤寒尚復吟秋草狐死猶能  
正首邱強理篋書聊自慰急呼家釀與澆愁不堪萸菊生佳色悵  
望雲山憶勝遊

和默菴遊林屋二首

聞道尋真林屋洞歸來笠澤路應賒未須勅賜鑑湖水所憶傳經  
許掾家蒸木煙侵雲去逸歸樵路逼澗崩斜只恐武陵迷去向移

船處處徧桃花

君向山中餌絳霞行經邱壑路忘賒仙公久住金庭館祕訣應畱  
玉斧家湖上帆將青影度煙中鳥趁夕陽斜亦欲維舟候春水華  
林相約采松花

題竹

歎息眞成汗漫遊經春歷夏又嗟秋林居已是能鳴士顧我寧非  
不繫舟江渚出吟聊白滴竹梢清淚活難收王孫莫道歸來好芳  
草天涯恨未休

三月廿日遊海雲蘭若寫竹石古槎

春盡湖濱偶獨來高僧煮茗話和諧鳥嘯花落忽如夢水影苔文  
渾上階坐詠遠遊悲世慮閒將曠達遣愁懷竹林生筍還相別人  
事睽離亦易乖

十三日晚步良輔南園

晚步南園秋滿林蒼茫斜日一登臨清池風度搖山影陰砌蛩悲

和客吟窗下玉琴桐露溼竹閒幽徑野泉侵雲樓不作人閒夢白鶴眠松萬里心

次薩天錫韻寄張外史

谷口路微山木合溼衣空翠不曾晴飢猿扳檻為人立寒犬號林如豹聲小閣秋清聽雨臥長林日出采芝行道心得失已無夢沐髮朝真候五更

附錄次韻

張天雨

梁溪歲莫若為情溪上梅花待雨晴徑雪曉埋山屐齒簷冰夜墮石牀聲內篇持向松根讀如意攜將竹裏行短晷何能理幽事南窗翦燭話寒更

寄鄭徵士

谷口子真今最賢久別鬱鬱夢相牽好營秫田多釀酒欲買茅屋尚無錢兄病每書賒藥券客來唯候煮茶煙闔城東有艇子憶爾青鐙相對眠

附次韻

鄭元祐

穴培薜荔根株懸倒架葡萄藤蔓牽非無洛下先生屋須待叩州錄事錢鴻雁天高音不雨鵲鶴沙暖白生煙松雲隱屋結構未何日書來解榻眠

又

張天雨

衣格常容蛛網懸石牀渾讓女蘿牽道術何煩孔郎廟屋廬政用郊超錢泉崩澗底歸樵路雨壓廚頭蒸木煙誰見西林拆書夜一枝風竹鶉鳩眠

和朱秉中三首

鳥嘯花落水西潯幾日門前春水深避世何心歌白石論交原不在黃金樗散餘年猶嗜酒夢回遠道獨驚心桃源亦有秦人在落日漁舟何處尋

僦居茅屋碧江潯花落空階一尺深山簡由來狂愛酒管寧不復顧鋤金長鯨吸浪成何事老鶴鳴皋見遠心中歲畏從親友別自

憐黃一作華髮已侵尋

白板扉開江水潯雨餘階下綠苔深  
愚人自寶應非石同舍緣知不盜金  
天地瘡痍誰復憫江湖羈旅我同心  
故山日日生歸夢翠竹青松自百尋

彥楨繼和復答二首

風生水國晝多陰錯莫遲回意自深  
鮑叔今封馬鬣冢鍾期誰範裏蹠金  
一官政不為人役七字真能慰我心  
乳燕鳴鳩更無賴片時春夢不堪尋

鳥嘯花落水西潯春水侵門雨尚深  
丈室自寬千戶邑一經已富滿籬金  
殘年樛散仍憂國短髮絲垂獨苦心  
可似桃源潔身去漁舟何處得重尋

寄德朋

故人欲問梁鴻宅遺跡猶應杵臼存  
楓葉菊花秋瑟瑟荒園廢圃雨昏昏  
農人掩舍春明墅縣吏催租夜打門  
惟有德朋多遠思賦

詩刻燭酒重溫

贈楊大同

石魚峰下子危子出有楊羲陪勝遊  
斜日碧山梁苑暮清風白拂冶亭秋  
松肪和飲三危露桂棹同乘萬里流  
擬酌春醪相慰藉梅花欲發聽鳴騶

題枯木竹石

在公以道不見忽忽七改年矣辛亥七月余來自苕溪偶過松陵之桐里雙井院數日矣以道因過慧日懺堂解后一見因寫竹樹小山并賦詩寄意云

一笑相逢豈有期因懷西崦話移時  
李公堂裏頻曾宿一作祠畔陸子泉頭舊有詩  
旅思淒淒非中酒人情落落似殘棋  
雲濤眼底三生夢鷗影秋汀又語離

以道因詠余舊詩春日試筆一首今三十年矣併書畫上是日秋水性源

喜看新酒似鵝黃已有春風拂草堂  
二月江南初破柳扁舟晚下

獨鳴榔苔生不礙山人屐花發應連野老牆世外靈辭一作美干

日醉未容人事惱年光一作莫將時

次韻叔勝先生七言一首錄呈伏冀賜教

朱弦流水寫徽音古意寥寥何處尋道力已消金鑛淨禪那曾住

嶺雲深毀譽不礙逍遙樂愆室應無忿忿心說與先生惆悵恨牛

山何日見成林

讚此兩三月方為義士之賢子與二三名勝作為文辭以頌述其德美且預為挽詩用文之類家傳而尸習或有每夜醉詠一過大笑而登牀者獨先生不隨流俗哀耳如何如何故賦此以發一笑云乞於韻會中檢尋珽字一觀明日即納還也恩恩不具讚

啟上

重改次韻奉答

朱弦流水寫徽音古意蕭寥尚可尋道業已消金鑛淨禪那曾住

嶺雲深猿猱騰攫初何怪風雨飄搖不動心笑爾自戕成濯濯牛

山何日見喬林

此閒俊秀子弟習尚不佳為二三不孝義無廉恥之徒誘引而喪其良心以不孝悌為當為以講論是非毀謗輕薄為政事蘭

蕙而尚化為茅況中人之才者乎先生以為何如  
良心淪亡糞壤何異是可哀也十三日瓚啟上

歲在甲寅中秋夜寓姻鄒氏病中詠懷

經旬臥病掩山扉巖穴潛神似伏龜身世浮雲度流水生涯煮豆

爨枯箕紅蠶卷碧應無分白髮悲秋不自支莫負尊前今夜月長

吟桂影一伸眉

壬子七月一日雷昌言高尚書堂寫圖賦贈下有陽文雲林子印

七月一日風雨集桐里湖邊吹夕涼柳葉顰煙籠翡翠荷花濺淚

溼鴛鴦卻疑身在瀟湘渚且著舟停雲錦鄉顧我自非徐孺子陳

蕃下榻更銜觴

贈別宋君仲溫有序


至正乙巳三月廿四日仲溫高士與沈文舉共載訪余笠澤東渚之蠡牛廬中相從過王明宅煮茶留坐遂以永日吹笙鼓琴於水光林影間但恨吾子儀遠在數千里外不得同此集也廿五日仲溫別余他之漫成長句以寫余懷

三月將闌春欲夏循簷共看辛夷花階前瀟茗香照色坐上吹笙

清不諱拄杖偶過公子宅班荆宛似山人家宋玉才情何可得肯

拋塵土蹋江沙

清闕閣全集卷之六



清闕閣全集卷之七

七言絕句

吳中

望中煙草古長洲不見當時麋鹿遊  
滿日越來溪上水流將春夢

過杭州  
九日登華氏溪亭

茱萸黃菊稍斑斑野水蒼煙草莽閒  
送客歸來逢九日華家亭上

獨看山  
六月五日偶成

坐看青苔欲上衣一池春水靄餘暉  
荒村盡日無車馬時有殘雲

伴鶴歸  
竹枝詞

會稽楊廉夫邀余同賦西湖竹枝詞余嘗暮春登瀕湖諸山而  
眺覽見其浦澈沿洄雲氣出沒慨然有感於中欲託之音調以  
聲其悲歎久未能成章因覩廉夫之作爲之  
心動言宣詞凡八首皆述眼前不求工也

錢王墓田松柏稀岳王祠堂在湖西西泠橋邊草春綠飛來峰頭  
烏夜嘯

湖邊兒女十五餘烏紗約髮淺妝梳卻怪爹娘作蠻語能唱新聲  
獨當壚

湖邊女兒紅粉妝不學羅敷春采桑學成飛燕春風舞嫁與燕山  
遊冶郎

心許嫁郎郎不歸不及江湖不失期蹋盡白蓮根無藕打破蜘蛛  
網費絲

阿翁聞說國興亡記得錢王與岳王日暮狂風吹柳折滿湖煙雨  
綠茫茫

春愁如雪不能消又見清明插柳條傷心玉照堂前月空照錢唐  
夜夜潮

嗚嗚歸雁度春江明月清波雁影雙化作斜行箏上字長彈幽恨  
隔紗窗

辮髮女兒住湖邊能唱胡歌舞蹋筵羅綺薰香回紇語白氍蒙頭  
如白煙

二月十九夜風雨淒然南渚旅寓篝燈與端叔共坐因念兵戈滿  
地深動故山之思遂賦一絕

春雨春風滿眼花夢中千里客還家白鷗飛去江波綠誰采西園  
穀雨茶

答陳參軍  
世故紛紛自糾纏南山修竹老風煙陳公懷抱政如此清影蕭蕭

月滿川  
偶成  
紫燕低飛不動塵黃鸝嬌小未勝春東風綠徧門前草暮雨寒煙

愁殺人  
贈馮文仲

知君近住西湖曲湖水淪漣似輞川窗下青松高百尺時時落雪

滿琴絃

春日

鶯囀花落罷琴尊山郭鳴鐘靄已昏  
莫嗔野鹿當蘿徑只有春風到葦門

青林微雨見東臯桑柘陰陰飛百勞  
可憐柳絮浮春水無復縈空百尺高

黯黯春雲映戶輕綠蕪斜日忽開晴  
依微野徑泉侵盡風落桐花遠思生

水仙花

曉夢盈盈湘水春翠虬白鳳照江濱  
香魂莫逐冷風散擬學黃初賦洛神

絕句

醉喚吳姬舞蹋筵風闌花陣亦迴旋  
愁生細雨寒煙外詩在青蘋白鳥邊

寄友

二月江水青接天楊柳隔江搖綠煙  
一夜愁心似春雪隨風舞影落君前

正月廿六日漫題

泖雲汀樹晚離離飲罷人歸野渡遲  
睡起香銷金鵲尾獨聽疏雨打窗時

宿玄文館

玄館清虛五月秋疏簾珍簟看瀛洲  
窗前種得青桐樹時有鳳皇栖上頭

答范徵君見懷

想見雨池春溜滿唯應閒院綠苔生  
落盡櫻桃杏花發輕舟歸去看春耕

別潘先輩

君來煙草正淒迷君去溪頭柳葉齊  
挂席中流竟東上莫重回首

向荆溪

宜遠樓

宜遠樓前春可憐數峰依約亂流邊若為倚劔崆峒外回望齊州

九點煙

次曹都水韻

水品茶經手自箋夜燒綠竹煮山泉莫畱樵客看棋局持斧歸來

幾幾年

蕭閒一作寒館裏挑燈宿山厨重敷六尺牀隱几蕭條聽夜鳴一作雨

竹林煙幕煮茶香

慧麓小隱

錫麓洞前開竹扉孟公舊築草堂基已倩王維圖別業更從裴迪

賦新詩

題立會菴壁閒

風雨縈窗一作愁夢不醒紫薇花發渚南亭望中迢遞孤煙起白鳥

飛來菰蔣青

追和戎昱寄許鍊師

雲霧軒窗倚半空少霞銘處識新宮遙看一片秋山色鶴影徘徊

明月中

至正十四年二月廿五日雨郊君九成畱宿高齋篝燈為寫春林

遠岫圖併次其韻

我別故人無十日衝煙艇子又重來門前積雨生幽草牆上春雲

覆綠苔

斷送一生棋局裏破除萬事酒杯中清虛事業無人解聽雨移時

又聽風

沒徑春泥不出門山煙江霧畫長昏糟牀聲雜茅簷雨破卻陰寒

酒自温

郊子論詩冀北空晤言千里意常同待晴紫陌堪縈手行詠山光

水影中



附錄郊九成原韻四首

杏花簾幙看春雨深巷無人騎馬來獨有倪寬能憶我黃昏躡  
屐到蒼苔

春色三分都有幾二分已在雨聲中牆東兩箇桃花樹恨殺朝  
來一陣風

十日春寒早閉門風風雨雨怕黃昏小齋坐對黃金鴨寂寞沈  
香火自溫

春寒時節病頭風惆悵年華逝水同世事總如春夢裏雨聲渾  
在杏花中

村居

疏疏梅雨橘花香寂寂桐陰枕簟一牀涼怪底林閒金彈子枇杷  
都熟不知嘗

雙井院前小立

山色微茫好放船秋蕖野水夕陽邊西風更灑菰蒲雨羨爾沙鷗

自在眠

舟過梁谿

蕩槳清溪欲盡頭亂山出沒暮雲稠便當濯足聊停棹何處飛來  
雙白鷗

宿義興先太初上人房

初公樓上雨蕭蕭楊柳垂煙隔岸搖何處舟人棹歌發山長水遠  
望蘭橈

周將軍祠隔水近岳鄂王廟亦東鄰百年故事誰記憶風雨清明  
愁殺人

雪中折枇杷花寄吳寅夫

雪中折枇杷花走寄城南處士家明日雪晴定相過兩株松下  
煮春茶

雪不止重寄

清夜焚香生遠心空齋對雪獨鳴琴數日雪消寒已過一壺花裏

聽春禽

三月廿日題所寓屋壁

梓樹花開破屋東鄰牆花信幾番風閉門睡過兼旬雨春事依依是夢中

鄰牆桂花盛開

扶疏桂樹隔鄰牆時有飛花到石牀起近南檐看月色不須更炷

水沈香

題靈巖寺壁

我到靈巖古寺中雲煙樓閣鬱重重今朝醉倒山前石畱取綸巾

挂偃松

寄陸鍊師

忽憶南湖陸鍊師若爲湖上住多時明朝擬望仙帆至好買松鱸

作膾絲

贈曹德昭

谷口桐林落絳霞仙帆初泊野人家蕭閒館裏青苔合看到階前芍藥花

客舍詠牽牛花

小盤承露淨鉛華玉雪依稀染碧霞弱質幽姿娛老眼傍人籬落

蔓秋花

江上

石侵春雨林閒蘚竹帶沙汀日暮煙江上清陰隨月落船頭白鳥

傍人眠

晚照軒偶題

南湖春水碧於天夢作沙鷗狎釣船綠樹拂簷風雨急覺來依舊

北窗眠

簷前幽鳥自相呼池上紅蕖映綠蒲五月夜涼如八月一窗風雨

夢南湖

寄友人

周君讀書離墨山山中臥看白雲閒翻然遂逐雲歸去松下草堂  
深閉關

煙雨

煙雨空濛遠樹齊人家樹底自成蹊只應三月吳松尾渚際維舟

聽竹雞

聞竹枝歌因效其聲

鈿山湖影接松江橘葉青青柿葉黃要寫新詩寄音信西風斷雁  
不成行

江流不住楚山青船到潯陽幾日程不忍寄將雙淚去門前潮落  
又潮生

雨後

雨後空林生白煙山中處處有流泉因尋陸羽幽棲處獨聽鐘聲  
思惘然

四月七日雨

水宿風行冬復春汀花汀草思紛紛泊舟無賴終宵雨夢入蒼梧  
萬里雲

六月十一日題吉祥庵壁

僧夏安居我息機清風日爲掃柴扉身形已似松梢鶴還有悲歌  
續令威

隨宜喧寂了殘生飯飽悠悠曳履行日落吳松半江影莫將欣厭  
惱閒情

乙巳三月七日清明風雨慣慣賦此

春多風雨少曾晴愁眼看花淚欲傾亂離漂泊竟終老去住彼此  
難爲情

雅宜山舊名娜如山益虞道園所更然未若娜如之名近古也施  
君宜之先隴在其處索余賦詩因爲竹枝歌二首遺之以復其

舊焉

娜如山頭松柏青闔閭城外短長亭來山未久入城去駐馬回看

雲錦屏

娜如山頭日欲西  
采香徑裏竹雞啼  
南朝千古繁華地  
麋鹿蒿萊望眼迷

二月十五日雨作

風軒紅杏散餘霞  
隄草青青桃欲花  
寒食清明看又近  
滿川煙雨亂鳴蛙

寄曹都水

溪南山影碧叢叢  
水閣風林處處同  
周處廟前新漲闊  
數聲柔櫓月明中

送初上人參禮光公二首

西崦欣逢初上人  
妙年藻思如春雲  
育王塔前禮佛竟  
應修白業益精勤

阿育王塔舍利存  
山氣無雪春冬溫  
蓮花臺近多羅樹  
中有人談不二門

對雨遣懷

數日枇杷花落盡  
可憐春事到櫻桃  
聽風聽雨眠三日  
排遣新愁付濁醪

懷都水曹君

荆蠻野褐最清癡  
怕與高人話別離  
記得解攜雙樹下  
風帆日短淚垂垂

贈墨生吳善

銅官山下白雲亭  
澗底長松長茯苓  
傳得潘生燒墨法  
墨成持贈寫丹經

寄德常別駕二首

長洲東去有僧居  
狂士來遊密雪初  
欲覓故人張別駕  
清貧猶苦出無車

愛爾作官清海濱  
海濤嶺雪白如銀  
已占麥隴雙歧秀  
一作楚麥  
明年喜  
漸有衣襦富昔民

松陵

松陵原上望長洲綠玉平鋪江水流好取釀爲千日酒大瓢酌月散煩憂

秋容軒

乍見芙蓉開滿樹更憐楊柳綠含風秋容好處無人會都在溟濛煙雨中

碧花翠蔓引牽牛藪竹黃葵意更幽不用田疇三日雨已輸穉穉十分秋

靈壁敲危四五峰枇杷細弱未成叢檜籬四面雲千畝牛背時聞一笛風

雜賦五首

恢公妙得華光理月影縱橫白尚玄留取禪門三昧法松滋楮穎過年年

空江水冷佩珊珊去國千年始一還身似吹笙王子晉夜騎白鶴

過緱山

一色清江四面同樓居如在畫圖中主人欲刻皆山記須得環滁老醉翁

曾傍江流築釣磯朱門華屋事都非身如王謝堂前燕歲歲猶過白板扉

痛飲酣歌未是狂有歧何處覓亡羊芹羹尤煎茅君酒更醉人閒一萬場

贈通上人二首

慧遠深心白蓮社湯休麗句碧雲篇纖摩不懈香燈供般若仍通文字禪

雨後春池芹細細月明寒渚竹娟娟東林門外聞鐘返只有陶公妙入玄

煙鶴軒

林宗道新闢小軒南望平蕪煙樹眇然有千里之思因名之曰煙鶴蓋取章刺史遠水煙鶴唳詩語爲賦二絕句著軒中

煙鶴軒前枕石眠一聲清唳落江煙攬衣起望行雲急遠思憑虛  
忽欲仙

楓落吳江雲雨空戛然鳴鶴紫煙中坐看雪影橫江去明滅寒流  
夕照紅

寄友

無室無家老更顛草木食度年年開春若問桃花宿先到俞君  
舊宅前

與錢伯行宿棲雲堂

小龍江上棲雲室望見石湖湖盡山來與幽人一作錢翁住三日白雲

妍暝滿中間

贈金嬾翁製箴箴

聞君有漏與無漏木杓箴箴都一般欲覓嬾翁安樂法無生話子  
說團藥

寄人

楊柳春風未放黃晴天孤雁不成行忽思小謝生幽夢芳草池塘  
路亦荒

調玄度

江渚荷花落日紅畫檐闌檻納涼風何人得似張公子詩在煙波

眺望中

六月九日過以中野亭賦

苴苗引蔓已過簷荇葉團團菱葉尖兀坐野亭忘日暮一作野亭中閒坐至

晚窗前竹影月纖纖

墨梅

幽蘭芳蕙相伯仲江梅山礬難弟兄室裏上人初定起靜看明月  
寫敷榮

贈玄容

枯柳疏條栖鳥稀歸人稚子候簷扉政如十月江南岸落日西山  
翠影微

林亭晚岫

八月江南未隕霜青楓欲赤碧梧黃停橈坐對西山晚新雁題詩已著行

王都事家聽周子奇吹笙

隔水吹笙引鳳鳴十三聲外柳風清風流自有王子晉畱取清尊吸月明

聞鷓鴣

林影朧朧鷓鴣聲歐陽詩句最關情畫簷宮燭朝儀早敲枕船窗憶太平

答王長史

經年不見王內史秋夜有懷如此何澄不為清撓不濁汪汪萬頃玉湖波

寄雪林隱君索折芍藥花

階前紅藥無人摘彩翠籠煙溪水南為折一枝和瑞露小窗卮酒

詠春酣

春雨

春雨蕭條獨掩扉庭柯逕篠綠依依莫思南渚停舟處煙柳垂陰滿釣磯

寄王叔明

野飯魚羹何處無不將身作係官奴陶朱范蠡逃名姓那似煙波一釣徒

題張元播扇

聽雨樓中暑亦一作自涼閒停筆硯靜焚香君來為煮嵇山茗自洗冰甌仔細嘗

贈原上人

上人住近西山麓左右泉聲喬木深拄杖逍遙扣門去臨池濡墨寫春陰

調張德機

空折花枝插滿盆清吟清坐想盤飧主人欲出一作松肪釀謾道糟牀尚苦渾

贈張德常二首

老疾吟哦張判官傲居江海覺心寬好乘黃鵠風埃表萬里雲霄一羽翰

齷齪疲駑飲齧餘鞭笞喘汗駕鹽車麒麟已老終超逸不受金羈去玉除

又寄

聞道淮安之任去尊君今在叔兮家來城又鼓吳淞柁好過苔磯弄釣車

此聞從者來吳城旦夕之官淮安復往吳淞迎尊君矣舟經笠澤能一枉顧否茲因令弟德機徵君之便輒成小詩以寄倪瓚再拜良常府判明公執事

題墨竹

燈下蕭蕭玉一枝吳松欲雪暮寒時憑君為把青鸞尾大掃陰雲

息怨咨

題李光祿墨竹

雲氣脩脩青鳳翎湘江鼓瑟情湘靈壁張此畫驚奇絕醉倒茅君雙玉瓶

題宋仲溫竹枝

畫竹清修數宋君春風春雨洗黃塵小窗夜月留清影想見虛心不俗人

寄王主簿

客愁最似未招魂老去情懷孰與論詩寄句容王主簿憶從白璧達天門太白嘗從金陵泝流過白壁山玩月達天門賦詩

寄張處士

江邊楊柳綠搖絲一作煙影落清波萬里天處士時時驚夢起一作曉夢門前椎鼓發鹽船

人我二首



人以秋毫軒輊我心澹然如碧淵何期失脚墮塵網談笑區中飽世緣

醉中了了夢中醒好語狂言不用聽莫起黑風飄鬼國長教明月照中庭

因盧山甫便寄曹德昭

使者停車溪水西借栽綠竹做幽棲玉川野客尋津去悵望孤帆意轉迷

船中

野水荒寒一作煙寂寞濱萋萋芳草也知春五湖雲浪浮天白好遣輕鷗狎隱淪

答王長史

蕭蕭短髮不須冠何處繫舟雲水寬西寒山前夕陽裏青芙蓉墮水精盤

秋日

芙蓉花下坐鳴琴疑在瀟湘斑竹林翠節霓旌煙雨溼秋來江水不知深

秋水清空

一作虛

似汎槎此生汨沒似無涯蕭閒堂上收書坐八月

芙蓉始著花

贈岳子

岳生孫子最清顛坐石彈琴和澗泉一簣松肪初釀得賸將醉爾竹林前

寄安遇

鄰家借得酒盈罌薄飯畱君午不羨僧夏安居餘半月重來相與說無生

雨晴

江上白蘋風起波冷紋縈碧暮煙和織成一幅鴛鴦錦零落紅衣遠恨多

七月二十八日過邱氏林居秋風騷然至暮大作終夜不息因

成小詩

西風楊柳暮騷騷零落江雲起怒濤坐看荷花都落盡倚窗孤詠  
楚天高

詠鵝三首

汎雪翻雲未足佳棲萍唼葦戲江沙舉羣此日籠歸去識得能書  
內史家

草青莎軟暮煙和點綴春江愛白鵝不似貪饕誇厭飫萬錢日食  
未嫌多

眞迹黃庭世所珍當時聊復送鵝羣寧知雪後攻城者使亂軍聲  
用進軍

二月六日南園四首

正月已闌煙雨寒泊舟東渚聽風滿山長水遠鳥飛急不是離人  
也鼻酸

雨裏櫻桃兩樹開北風吹盡臘前梅荒筠隔隩無多柳細草汀洲

併是苔

春月寒逾臘月寒盲風怪雨泊江干天工自不爲人料一種春光  
有幾般

有子政如無子同異居邈若馬牛風人間何物爲眞實身世悠悠  
泡影中

贈僧

清流堂上無塵事奇石修篁映梵書長日粥魚齋鼓罷竹窗虛寂  
坐如如

絕句

七月三日快哉風野亭不厭酒杯空況有尊前沈腰瘦何妨醉倒  
田家翁

題高房山畫卷

屋邊昨夜春風起蔣芽荇葉生春水睡醒獨坐無人聲歷歷青山  
水光裏

吳仲圭山水

道人家住梅花村窗下松醪滿石尊醉後揮毫寫山色嵐霏雲氣淡無痕

題秋江圖

長江秋色渺無邊一作鴻雁來時水拍天七十二灣明月夜荻花

楓葉覆漁船

畫竹贈申彥學

吳松江水似清湘煙雨孤篷道路長寫出無聲斷腸句鷓鴣嗁處竹蒼蒼

阿儂渡江畏風波聽渠聲唱竹枝歌淇園青青淇水綠不似瀟湘煙雨多

雲林小景圖

赤城霞暝神芝秀洞裏桃花不記春何事卻將山水腳鍾陵市上蹋紅塵

後數年復用原韻

憶昔舟歸雪浦濱松林瑤草欲生春閒拈逸筆圖清思今日披圖似隔塵

題畫十二首

南望銅官曉色新三株松下一茅亭何當濯足臨前澗坐石閒書相鶴經

落落長松生夏寒莓苔樗散共盤桓王謝家庭多玉樹依然猶是晉衣冠

舟過松陵甫里邊幽篁古木尚蒼然何人得似王徵士靜看輕鷗渚際眠

坦腹江亭枕束書澄清江水自空虛修篁古木悠悠思何處青山可卜居

松瀑飛流到枕邊道人清坐不須絃青山點點白雲外用意何曾讓鄭虔

新柳春柯未著鴉短籬茅屋野僧家放舟不怕歸來晚白水田畦  
已有蛙  
湖水清空好放船青山依約白鷗邊忽思周處祠前路古木荒煙  
一惘然  
笠澤依稀雪意寒澄懷軒裏酒杯乾篝燈染筆三更後遠岫疏林  
亦耐看  
嘉樹幽篁湖石隈當年曾此好懷開如今寂寞空山裏誰復緘情  
折野梅  
樓閣參差霞綺開峰巒重複水縈迴赤闌橋外垂楊下步月吹笙  
向此來  
青山矗矗水舒舒相見郊原霽雨初絕似三高亭上望人家依約  
樹扶疏  
右臨青嶂左澄江未覺羲皇遠北窗安得茅君酒斟酌幽人許致  
玉瓶雙

爲吳溥泉畫窠石平遠圖漫題

地僻林深無過客松門元自不曾關展將一幅溪藤滑寫得湖陰  
數點山

題畫贈原道

二月東風溪水綠幽林修竹影參差杖藜日日溪西路魚鳥相娛  
只自知

題張以中畫

密雪初晴僧舍深地爐活火酒時斟張家公子清狂甚冒冷看山  
意不禁

題吳采鸞像

誰見文簫逐采鸞碧山蘿月五更寒猶遺寫韻軒中跡畱得風流  
後世看

爲吳處士畫喬林礪石

山家日出無行蹤雪樹煙蘿遠且重不見鹿眠磐石上提壺自挂

一長松

題趙榮祿措癢馬圖

韓幹真龍下筆肥銀鞍羅帕絡青絲春風碧野和煙放誰見林間措癢時

題棘禽筠石圖送高霞還玄元館

煙雨蕭蕭墨未乾幽禽枝上語春寒玄元館裏多筠石飯飽臨池自在看

題陳仲美畫次張貞居韻

杜老茅堂倚石根往來西灑與東屯一庭秋雨青苔色自起鉤簾盡綠尊

斜日西風吹鬢絲披圖弄翰學兒嬉釣竿拂著珊瑚樹張祐題詩

我所師

為蹇原道題竹木圖

疏篁古木都成老石澗莓苔亦有花排悶不須千日酒聊將小筆

畫龍蛇

題寂照蔣君遺像

併引

君諱圓明字寂照暨陽人也年二十一歸於我勤儉睦雍里稱孝敬歲癸巳奉姑挈家避地江渚不事膏沐游心恬淡時年四

疾十八日儵然而逝題像甲辰正月廿四日也幻形夢境是耶非縹緲風鬟雲霧衣一片松閒秋月色夜深惟有

鶴來歸

梅花夜月耿冰魂江竹秋風灑淚痕天外飛鸞惟見影忍教埋玉在荒村

題曹雲西畫

吳松江水碧於藍怪石喬柯在渚南鼓柁長吟采蘋去新晴風日更清酣

題畫與強仲端

日暮移舟何處泊強家亭子水西頭惠山只在湘簾外雨後幽泉想亂流

題畫贈崔子文之金陵

性癖居幽每起遲一來溪口意淒迷林亭曉色蒼茫裏目送風帆  
過水西

拜石圖

米章愛硯復愛石探瑰抉奇久為癖石兄足拜自寫圖乃知顛名  
不虛得

題畫

疏林小筆聊娛戲畫與金華張隱君好為林間橫玉筵秋風吹度

碧山雲

我識幽人顏仲逸藥闌竹逕近前除不將世事經心耳濁酒盈尊

讀漢書

題竹樹圖二首

海中鐵網珊瑚樹石上銀鉤翡翠梢烏夜亂嗁江月白檀欒飛影  
下窗坳

江邊樹影墨模糊江上青山日欲晡野思悵然無晤語時來臨水  
照眉鬚

為德常寫竹

張公宅裏挑燈話對影依依夢寐同坐到夜深喧境寂庭前疏竹

起秋風

題畫竹贈張元實

髯翁中歲得麟兒漆點雙瞳玉作頤可惜空齋無楮穎為拈秃筆

掃風枝

次張外史韻題商學士畫

獨棹扁舟引興長疏林遠岫見微茫商侯畫筆張仙句可比豐城

寶劍光

柯丹邱梅竹

竹裏梅花淡泊香映空流水斷人腸春風夜月無蹤跡化鶴誰教

返故鄉

古木竹石圖

古木幽篁春淡淡斜風細雨石蒼蒼何人識得黃花老弄翰同歸粉墨囊

題畫贈王允同

湛湛綠波春雨裏娟娟翠竹曉風前此中著得玄真子一棹夷猶獨醉眠

桐露軒前月滿窗竹聲樹影落春江青苔石逕無人跡坐待歸來白鶴雙

二王遊騎圖

每憶開元全盛時二王遊騎日追隨鵲鴿原上雙兄弟挾彈荒郊想鳳池

看花仕女圖

畫圖常識春風面雲霧衣裳楚楚裁為問人閒春幾許石闌西畔牡丹開

仕女剖瓜圖

月彎削破翠團團六月人閒風露寒誰免東陵故侯去但知華屋薦金盤

趙魏公蘭

天上宣和落墨花彝齋松雪擅名家遙看茗雪山如玉雪後春風自茁芽

管夫人竹

夫人香骨為黃土紙上蕭蕭墨色新悵斷鷗波亭子上鏡臺鸞影暗凝塵

柯丹邱梅竹

山川搖落夜漫漫老木幽篁巧耐寒畫裏陳侯有佳句皎如明月映琅玕

題陳惟允畫

韓公會聽穎師琴山水蕭條太古音不作王門操瑟立溪山高隱

竟何心

題趙承旨墨竹

籊籊生綃寫竹竿愁看春雨溼一作空壇風流誰識當年意萬里

鷗波煙景寒

題木石贈邱志

古木幽篁邱氏宅江波落日妙蓮莊泊舟風雨留三宿一作臥看

鳥鷺十里塘

荆溪秋色圖為卜震亨題

卷畫溪頭秋水明上人逸筆思縱橫雲山多少玄暉句不道毫端

畫得成

為潘仁仲寫梧竹草亭

翠竹蕭蕭倚碧梧一亭聊以賦閒居浮杯樂飲思潘岳藻思春江

濯錦如

韋羌草堂圖

韋羌山中草堂靜白日讀書還打眠買船欲歸不可去飛鴻渺渺

碧雲邊

宿禪悅僧舍題趙榮祿馬圖

山僧院裏無塵事夜雨燈前興不孤寥寥說竟無生話更覽王孫

駿馬圖

畫贈王生

白沙岸下幽人宅翠竹林中賣酒家好事江干王處士客來為黍

酒仍賒

松澗圖

青松澗底結淒陰老大還無用世心張洞西邊煮藥竈山靈虛閉

白雲深

題墨水仙花

宋諸王孫釋大雲清詩多為雪精神誰言一點金壺墨解寄湘江

萬里春



仲穆馬圖

花門舊進青驄馬天水王孫貌得真溪上猶遺光祿宅海寧何以  
久風塵

題幽篁古木圖贈文靜徵君

環慶堂前翠竹多雨苔侵石樹交柯不遊罨畫溪頭路奈此春宵  
月色何

題畫竹

娟娟風枝墨未乾美人湘水逐笙鸞恍然一枕遊仙夢清影縱橫  
山月寒

怪石足當米老拜修竹定是王猷栽磊落瓊瑰雨洗出團欒清影  
月移來

怪石雨餘苔蘚滋月明鸞尾影參差春風忽過庭前樹會見清陰  
覆墨池

斑斑石上蘚紋新陰落先生烏角巾貌得兩枝初雨後可憐清興

屬幽人

爲寫新梢十丈長空庭落月影蒼蒼王君胷次冰霜凜翦燭談詩  
夜未央

琅玕節下起秋風寒葉蕭蕭煙雨中贈子仙壇翠鸞帚杏林春掃  
落花紅

逸筆縱橫意到成燒香弄翰了餘生窗前竹樹依苔石寒雨蕭條  
待晚晴

題畫

白雲孤鶴莫知還船泊錢塘看越山珍重今朝重展卷吟詩作賦  
北窗閒

小坡曾寫雞棲石猶在荆溪山寺中幾欲規摹渾忘卻可憐零落  
墜秋風

庭樹霜黃尚有陰午窗危坐自鳴琴問誰得似沈夫子北牖羲皇  
見此心

荷葉田田柳弄陰菰蒲短短徑苔深鳥飛魚躍皆天趣靜裏游觀一賞心

中州人物獨黃華父子詩畫逸出氈裘之表為可尚也觀澹游此

卷筆意蕭然有蔡天啓之風流蓋高尚書之所祖述而能冰寒

於水與卷後有歐陽承旨所賦詩不揆因次其韻時丙午六月

晦日

羲獻才情似水清暑窗葵扇與桃笙中州父子黃華老信是前賢

畏後生

後二十三年為戊申歲元度張君得此持以示僕披卷如夢寐閒

也因援筆次外史韻詩已為之泣然外史已仙去張榮祿鑑禪

師不見數十年存亡不能知尤令人懷斷也九月十日題

偶寓姚城江上村木如蛟舞石如鼉清風明月許元度為余傾倒

綠波軒

清閼閣全集卷之七



